

Babad Dêmak, De Bra (Dewabrata), 1914, #1295
Katalog

Katalog # : 1295
Titel : Babad Dêmak
Versi : De Bra (Dewabrata)
Tahun : 1914
Image : Babad Dêmak, De Bra (Dewabrata), 1914, #1295
Tipe : Terbitan
Bentuk : Tembang
Bahasa : Jawa
Aksara : Jawa
Ikhtisar : Menceritakan kisah masa kecil Kidang Telangkas (Jaka Tarub), setelah dewasa menikah dengan Nawangwulan dan mempunyai anak Dewi Nawangsih. Kemudian Nawangsih menikah dengan Bondan Kejawan (putera Brawijaya). Diceritakan pula awal mula berdirinya kerajaan Demak, dan Raden Patah sebagai rajanya yang bergelar Sultan Syah Alam Akbar. Kerajaan Demak merupakan kerajaan Islam I di Jawa.
Kata kunci : aksara, babad, cetak, cithak, jawa, jawi, tembang, sekar
Data digital :
1. Babad Dêmak, De Bra (Dewabrata), 1914, #1295. Kisah, Cerita dan Kronikal | Babad #220.
Deskripsi

Judul
Luar : Babad Dêmak
Dalam : -
Lain : -
Sub-judul : -
Bagian dari : -
Memuat : -
Series dari : -
Penyusun
Jumlah : 1 dari 1
Peran : Penyalin
Peran ref. : Yun wignya nurat nurun pustaka puniki
Nama depan : Ki
Nama belakang : De Bra [Dewabrata]
Kedudukan : -
Lokasi : -
Tanggal : Saptu Wage, 13 Sapar, Ehe 1844 A.J., [11 Januari 1914 A.D.]
Jilid
Jumlah : 1 dari 1
Jilid # : 1
Series ref. : -
Jilid titel : -
Penerbit : -
Tempat : -
Tanggal : -
Edisi ref. : -
Print ref. : -
Halaman : 195-320
Gambar : 6
Kosong : -
Sumber
Jumlah : 1 dari 1
Sumber : Yayasan Sastra Lestari
Katalog : 1295
Tipe media : Asli
Ukuran : 15.3 x 11.3 cm.
Ukuran teks : 11.7 x 9 cm.
Fisik : Jilidan sampul luar depan sudah lepas. Kemungkinan naskah ini berbentuk bendel karena halaman 1-194 tidak ada.
Kertas : HVS kecoklatan.
Rusak : -
Tulisan : -
Penomoran : -
Digitisasi
Transkripsi oleh : Yayasan Sastra Lestari
Digitisasi oleh : Yayasan Sastra Lestari
Tanggal : Jan 2007
Sumber : Yayasan Sastra Lestari #1295 Asli

Babad Dêmak, De Bra (Dewabrata), 1914, #1295

Katalog : Babad Dêmak, De Bra (Dewabrata), 1914, #1295

Sambung : -
Babad Dêmak

Inggi punika pungkasaning agami Budha kagantos agami Mukhammad

Kawiwitan saking cariyosipun Jaka ing Tarub

--- [0] ---

[Iklan]

--- 195 ---

1. Sinom

1. taruna dama kiratha | nging mêgsa ambêg kumasis | kapencut yun
wignya nurat | nurun pustaka puniki | mung pamintamba mugi | mring pra
maos ywa ginuyu | myang paringa aksama | rèh amba agung kumaki |
salugune dèrèng wrin anggêring sastra ||

2. nanging mêgsa ngeka-eka | mêngêti tatkala wiwit | tinulis sêrat punika |
ri Saptu Wage marêngi | wulan Sapar tanggal ping | tiga wlas ing jroning
taun | Ehe tinêngran ôngka | sèwu wolung atus tuwin | kawan dasa
sakawan ingkang lumagsa ||

3. ingkang jinêjêr ing kôndha | wau Sèh Molana Mahgrib | duk tinilaran
Kunthara | saklangkung kewraning galih | awit wiku tatèki | nèng
madyaning wana agung | tanpa rowang sajuga | sang tapa osiking galih |
arsa marang ing desa Tarub samana ||

4. tandya wisata gal-inggal | sarwi bopong jabang bayi | tan kèri sangkuh
tulupnya | sinigêg ingkang lumaris | nênggih gênti winarni | pawèstri ing
dhusun Tarub | nêmbè tinilar pêjah | mring laki tanapi siwi | nyi warôndha
kalangkung susah ing driya ||

5. tambuh raosing wardaya | saking gunging kang prihatin | kapungkur
bukti myang nendra | tan liyan kaciptèng galih |

--- 196 ---

mung lakinira tuwin | sutanya ingkang wus lampus | nuju turu kêkadhar |
nyi rôndha sêmana ngimpi | pinanggih mring lakine kang wus laya ||

6. pitutur kinèn narima | lawan pinaringan èsthi | alit kinèn nyurtènana |
yèn wus gêng marakkên mukti | nyi rôndha nuli tangi | mriksa padhang
kadya daru | tibèng pênah makaman | kuburing laki twin siwi | wus raina
nyi rôndha marang makaman ||

7. sarawuhirèng kuburan | nyi rôndha tandya kapanggih | kalawan Sèh
Maolana | nyi rôndha dèn pituturi | lan pinaringan bayi | kinèn ngaku
putranipun | salire wus winartan | lan malih dipun paringi | sangkuh tulup
sampun tinampèn nyi rôndha ||

8. wus têlas pangandikanya | wau ta Sang Maha Yêkti | tandya lon-alon
wisata | apan arsa jajah bumi | nyi rôndha laju mulih | sapraptaning
wismanipun | ngundang-undang brokohan | kulawangsane kèh prapti |
ambrokohi putra mati mulih gêsang ||

9. tyang Tarub kathah kang prapta | tatuwi mring jabang bayi | sami lek-
lekan samana | kathah parêpat kang prapti | môncalima tanapi | asung
pasumbang sêdarum | bayi mahyakkên bagya | nyi rôndha sugih tumuli |

--- 197 ---

kang Kunthara sinusonan datan arsa ||

10. nusu swendanya[1] priyangga | ayêm datan mawi nangis |
suprandene kuwat akas | pan wus karsaning Hyang Widhi | kunêng gènti
winarni | Sri Narendra Majalangu | Sang Prabu Brawijaya | garwanira
ingkang kalih | sami bobot babar praptaning sêmaya ||

11. amiyos kakung sadaya | kang mijil Dyah Dwarawati | kakung bagus
warnanira | tênggran Dyan Bondhan Suratî | ginadhang madêg aji | gumanti
mring rama prabu | kang miyos putri wandhan | Dyah Ratu Kumaya
nênggih | inggih kakung nama Dyan Bondhan Kêjawan ||

12. kang ibu seda konduran | radyan binuwang wit bayi | pinaringkên juru sawah | kinèn ngaku putra yêkti | pacuh lan tiyang alit | tan kêna warta mring sunu | kunêng kang lagya babar | ya ta gênti kang winarni | Sunan Benang èngêt marang kang pêndhêman ||

13. sabat murite pinêpak | kinèn sikêp wadung kudhi | kangjêng sunan sigra budhal | sampun rawuh ing wanadri | waringin wus kêpanggih | sakèh wrêksa ron ngrêmbuyung | anuli binabatan | tinêgor ingkang waringin | gya kadhudhuk pêndhêman putra ing Tuban ||

14. pinêrnah ngambèn-ambenan | lir gana warnane putih | binêkta kondur mring Benang |

--- 198 ---

ing marga datan winarni | padhukuhan wus prapti | kinutugan sêkul baru | eling Ki Jaka Tuban | pungun-pungun gya ngabêkti | sru rinangkul Ki Jaka mring kangjêng sunan ||

15. langkung sih Jêng Sunan Benang | dhumatêng putra ing Tubin | ingaku kadang taruna | pinanggihkên lan kang rayi | pinaringan kêkasih | Sèh Malaya wus misuwur | panggihe tan winarna | sampun atut palakrami | Sèh Malaya dadi kadang Sunan Benang ||

16. kunêng ingkang pinêngantyan | nyi rôndha Tarub winarni | abrôngta momong kang putra | lamine datan winarni | wus agêng jabang bayi | misuwur Ki Jaka Tarub | warna bagus utama | balaba alus ing budi | Radèn Jaka sinuyutan lare kathah ||

17. Radèn Jaka ri sêmana | anêdhêng rumaja siwi | karêm asaba ing wana | pra lare lit-alit sami | kathah kang atut wuri | Ki Jaka arêmên nulup | wuluh ingkang kinarya | nulup kandhêla myang pêksi | sabên dina Ki Jaka marang ing wana ||

18. nyi rôndha susah kang manah | lamun kang putra tan kèksi | samana prapta kang putra | kang ibu ngrangkul sarya ngling | dhuh putraningsun kaki | sêka ngêndi sira kulup | sadina tan katingal | agawe sumlanging ati | ingkang putra umatur yèn saking

--- 199 ---

wana ||

19. kang ibu malih ngandika | lah ta nyawa putra mami | aja sira lunga-
lunga | mêngko kulup sun tuturi | yèn ing wana puniki | angkêre
kalangkung-langkung | tan kêna ngambah janma | janma sato mara mati |
sira anggèr bokmênawa kênèng beka ||

20. aywa gung saba mring wana | ora ana sun tingali | angur sira jêjaluka |
sapatute sun turuti | tilarane sudarmi | apa ingkang sira jaluk | wong
dhasar sarwa ana | nanging aja lunga gusti | ingkang putra umatur sarwi
karuna ||

21. dhuh ibu nyuwun kawula | tulup mawi sangkuh mandi | ingkang sae
tiningalan | kula arsa nulup pêksi | kang ibu wus andugi | mêngko birai
putrèngsun | apan rinangkul nulya | kang putra dipun tuturi | inggih sarwi
pinaring sangkuh tulupnya ||

22. nyi rôndha sarwi ngandika | wus diwasa sira kaki | sêdhênge nambut
akrama | miliha putri yu luwih | kang maksih prawan sunthi | putraning
lêlurah dhusun | miwah putraning dêmang | gung prapta ngunggah-
unggahi | sabên dina anggèr marang jênêngira ||

23. kaki sira amiliha | êndi ingkang dadi apti | mêngko sun lamare nyawa |
mupung ingsun maksih urip | ingsun kapengin ugi | anggèr momong anak
[a...]

--- 200 ---

[...nak] mantu | kang putra aturira | ing mangke dèrèng marêngi | lamun
mulat pawèstri lir sami priya ||

24. nyi rôndha malih ngandika | anggèr apa sira apti | krama widadari
swarga | dene manungsa tan arsi | Dyan Jaka matur malih | kadi botên lir
puniku | ing mangke dèrèng arsa | taksih rêmên momong dhiri | ingkang
ibu tan wignya malangi karsa ||

25. pan kongsi surup Ywang Arka | nyi rôndha dènnya nuturi | wau
marang ingkang putra | kawarnaa sampun enjing | Ki Jaka kesah nuli |
tulupanira tan kantun | wasiyating sang tapa | ingkang mawi sangkuh
mandi | tanpa rowang Ki Jaka malêbèng wana ||

26. sarawuhing madyèng wana | myarsa pêksi anggung muni | apan nuli
pinaranan | kang pêksi manggung ngendrani | angalih datan têbih |
radyan nut saparanipun | kunêng gènti winarna | kawarna pra widadari |
sami siram nèng tlaga madyaning wana ||

27. anuju dina Anggara | Kasih têngange kang wanci | ing sabên-sabên
mangkana | yèn dina Anggara Kasih | têngange ingkang wanci | widadari
sami adus | ana ing tlaga ika | catur kèhe widadari | tumrun anjog nèng
têping kang talaga ||

28. samya ngadêg pinggir tlaga | lukar samir lan kulambi |

--- 201 ---

tanapi ingkang kasmêkan | sinèlèh gêgilang sami | sadaya kirap wèni |
amung kari tapih pinjung | samya ngagêm patlêsan | sira Sang Dyah
Nawangsa | têtêsan sangkêlat ijo prasaja ||

29. Rêtna Mayangsêkar nyandhak | têtêsan sutra kuning | Sang Dyah
Gagarmayang sigra | angagêm têtêsanèki | sutra brit nèm rêspati | Dèwi
Surendra agupuh | angagêm têtêsananya | sutra biru nom mantêsi | tandya
sarêng sami anggêbyur ing tirta ||

30. timbalan sami siratan | asuka-suka mawanti | datan mawi taha-taha |
tan ana janma udani | tan nyana ora ngimpi | lamun ana wran kang wêruh
| wêntis kengis katingal | prêmbyun tan dèn rawati | sang dyah catur
samya tandhing payudara ||

31. Ki Jaka Tarub winarna | kang nulup pêksi ngendrani | sangsaya
kalunta-lunta | kang pêksi amôncawarni | nênggih kelangan lari | Ki Jaka
anuli ngrungu | swaraning widadarywa | Ki Jaka sigra marpêki | osiking
tyas apa kang anèng têtaga ||

32. punapa jin pri prayangan | apa ta setan puniki | yèn manungsa yêkti
mokal | sing kiraku widadari | sajêg durung udani | rêrupan èdi lir iku | Ki
Jaka duk samana | mitênggêngên [mi...]

--- 202 ---

[...tênggêngên] tan bisa ngling | ingkang siram dahat tan ana uninga ||

33. adangu kungkum ing toya | têtêsanè krakêt wêntis | kadi datanpa
têtêsan | wela-wela dèn tingali | anut lembaking warih | kapriksa
sadayanipun | Ki Jaka jêngêr mulat | kadi pêjah jroning urip | ingkang
siram nutug dènnya sêsiratan ||

34. Ki Jaka anuksmèng driya | kayaparan solah mami | adangu datan
ngandika | mangkana osiking galih | arsa nyêlêr kulambi | sangkuh kang
kinarya sampun | inguthik kang rasukan | kêna kang tumumpang nginggil
| kalêrêsan rasukane Nawangwulan ||

35. Ki Jaka ririh undurnya | kang siram datan udani | Ki Jaka anuli mentar |
pan sarwi nyangking kulambi | lampahnya praptèng panti | nanging tan
ana kang wêruh | jujuk lumbung sêmana | nyingitakên kang kulambi |
sinèlèhkên tumpukan pari ngandhanya ||

36. Ki Jaka malêbèng wisma | angambil sinjang kulambi | tanapi lawan
kêmbênnya | bêlah bantên sora sari | kinancing kancana di | apan sutra
samiripun | nênggih cindhe puspita | Ki Jaka anuli bali | sinjangira
binêntingkên tan kêtara ||

37. gya rawuh pinggir têtaga | alon gènira lumaris | rahadyan brangkang
lampahnya |

--- 203 ---

ngarah-arrah ywa kongsi wrin | marang kang siram sami | amping-
ampingan wrêgsa wus | jêngking pangintipira | wau ta kang widadari |
dangu-dangu mambêt gandaning sujanma ||

38. nyandhak rasukan wus mêsat | mring kayangan widadari | kantung
Sang Dyah Nawangwulan | tan bisa mibêr nututi | mring kancanira sami |
wit nir kasêntikanipun | marga ilang klambinya | sang dyah putêg jroning
galih | sabab pama pêksi ilang kang pênjawat ||

39. saklangkung susah ing driya | risang Rêtna Nawangsasi | maksih
kungcum anèng toya | karuna sajroning galih | sang dyah osiking galih |
kayaparan raganingsun | sapa ingkang tulunga | dhuh kapriye awak mami
| ora wurung sun mati sajroning toya ||

40. dadya sang rêtna pratiknya | samangkana dènira ngling | sapa baya
têtulunga | anutupi wirang mami | lamun janma pawèstri | yêkti sun aku
sadulur | ngarcapada dêlahan | manjinga sudarawèdi | lamun priya sun
aku sadulur tuwa ||

41. ing donya praptèng ngakerat | dadia kadang sayêkti | sok bisaa asung
luwar | marang kawirangan mami | Ki Jaka duk miyarsi | pratignyanira
sang ayu | kumênjut manahira | wusana dhèhèm aririh | sang rêtnayu
[rêtna...]

--- 204 ---

[...yu] kagyat kumêpyur tyasira ||

42. angrasa yèn kamanungsan | arsa kesah dèn aruhi | Rahadèn Jaka
ngandika | lah dika putri ing pundi | dene kungcum ing warih | nèng tлага
têngah wana gung | sang rêtna saurira | kawula dede sujanmi | widadari
tinilar mring kancaningwang ||

43. têtiga sami ngumbara | mantuk mring kayangannèki | Ki Jaka aris
ngandika | de paduka widadari | tan wignya mring wiyati | sang rêtna
malih umatur | mila kula tan bisa | pan ical rasukan mami | gih rinakut
binêkta mring kancaningwang ||

44. tan ana kang nusulêna | sayêktine widadari | yèn ical rasukanira | tan
sagêd mibêr wiyati | paduka janma pundi | tuwin sintên kang rum-arum |
mangke paran sinêdya | Ki Jaka mangsuli aris | gih kawula atêngran
Kidang Têlangkas ||

45. ing Tarub wisma kawula | kang darbe têtaga niki | lah balik ingsun
têtanya | sapa aranira yayi | sang rêtna amangsuli | Nawangsasi nama
ulun | dyan malih angandika | paran karsanira yayi | dene anèng têtaga
têngahing wana ||

46. matur Rêtna Nawangwulan | têtambung lir madugêndhis | yèn
sambada lawan karsa | sampun atanggung sang pêkik | tulung wong
kawlasasih |

--- 205 ---

prajangji kêpanggih pungkur | Ki Jaka angandika | gampil wicara puniki |
lamun wontên jangjine kula kaduga ||

47. sang rêtna aris aturnya | yèn dika tulung mring mami | manjinga dadi
sudara | ing donya tumêkèng akir | Ki Jaka anauri | mung sêpele bae iku |
sang dyah malih turira | lah inggih kadi punapi | Radyan Jaka arum wijiling
wacana ||

48. lah yayi tutur kewala | ingsun iya andarbèni | sandhangan amung
sapala | ingsun gawe beya rabi | sang rêtna matur malih | ngamungna
manjing sadulur | Ki Jaka angandika | lamun tan marêngi yayi | ingsun
mulih yayi sira akèria ||

49. kumêpyur tyasira sang dyah | dupyarsa tinilar mulih | matur inggih
sinabarna | sae pinikir rumiyin | kang sami mrih basuki | pan sami
mundhak lumungsur | dyan aris angandika | pathok bangkrung ingsun
yayi | wau sang dyah manuksmèng sajroning driya ||

50. yèn ingsun tan nurutana | kayangapa wêkasaning | tan wurung mati
nèng taga | tan ana ingkang ngulati | baya uwis pinasthi | mring bathara
kang linuhung | ingsun krama manungsa | apêkik têtambung manis | kang
darbèni têtaga padusan ingwang ||

51. kewran ature sang rêtna | ing sêmu condhong [co...]

--- 206 ---

[...ndhong] kang galih | andhêku aris turira | kawula lumiring kapti | Radèn
Jaka nguculi | sinjang klambi kang kinandhut | sarta aris dêlingnya | lah
ênnya dandana yayi | pinaringkên sinjang klambi mring sang rêtna ||

52. tandya nampèni kang sinjang | sang dèwi sarwi angliring | lir pasopati
gumêjras | asarêng paguting liring | suh rêmpu tyas sang pêkik | sang
dyah tyasira kumênjut | gya ngagêm kang rasukan | asêlendhang
rangkêp samir | kadya Ratih duk mukti anèng kaswargan ||

53. sigra kondur sakalihan | wirandhungan lampahnèki | ing marga datan
winarna | samana wus praptèng panti | nyi rôndha sukèng galih | têka
mangke putranipun | akrama widadarywa | anulya binojakrami | radyan
lawan sang rêtna binayangkarywa ||

54. sawusing surup Ywang Arka | gumanti padhanging sasi | Ki Jaka
ngimur ing garwa | têmbunge lir madugêndhis | Sang Rêtna Nawangsasi |
kèndêl anèng jinêmsantun | karasa manahira | dene pisah yayah bibi |
Radyan Jaka mangkana arum dêlingnya ||

55. ywang dewataning kusuma | kang sawang pêputran gadhing |
pathining jumêrut mirah | pinuja dadya maskwari | ratuning pra apsari |
jimate pun kakang sèstu | yayi tolèhên [tolèhê...]

--- 207 ---

[...n] ingwang | sampun gagas yayah bibi | mung ketanga dasihe Kidang
Têlangkas ||

56. sang dyah mèsêm èsmu duka | kadya thathit garit ati | ingaras
atangkis asta | mengo apan sarwi jiwit | radyan wus praptèng rêsmi |
datan winarna kang lulut | tangèh lamun rinêngga | mrih gancang
ingkang kawi | ing alama-lama garbini sang rêtna ||

57. yèn garbini widadarywa | sayêkti beda lan janmi | unggyannya garbini
sang dyah | milang kèdhèp ingkang sasi | sakêdhepan sêsasi |
samangkana sampun sêpuh | sêdhêng praptèng samaya | antarane
sangang sasi | nuli babar kang putra miyos wanodya ||

58. cahyane mancur gumilang | lir wulan purnamasidhi | langkung sihira
kang rama | putra pinaringan nami | Dyah Rêtna Anawangsih | ibu rama
sih kêlangkung | lamine tan kawarna | Ki Jaka amomong siwi | ingkang
putra tansah wahanèng êmbanan ||

59. yuswane Rara Kasihan | nênggih lagya têtung sasi | dipun êmban
ingkang rama | marêngi nangis kapati | sinusulakên nuli | mring kang ibu
sang rêtna yu | sang rêtna lagya adang | tan wontên rowangnya malih |
kêtanggungan kang putra nuju bobotan ||

60. sang sukèksi aturira | marang kang raka sang pêkik |

--- 208 ---

andika têngga dangdangan | nanging sampun salah kardi | sun nyêluk
para nyai | mring kali dangu tan mantuk | sang rêtna tindakira | mring
narmada ngêmban siwi | ngumbah popok sarwi ngundang kang pawongan
||

61. dilalah karsanirèng Ywang | kang raka dènnya nunggoni |
dangdanganira punika | dumadakan dèn ungkabi | liningkap kêkêpnèki |
dangdangan kapriksa suwung | tan ana isinira | mung wontên pari sawuli |
radyan kagyat winangsulkên kêkêpira ||

62. kunêng kang têngga dangdangan | kawarnaa sang lir Ratih | sira Sang
Dyah Nawangwulan | botên sakeca ing galih | sadangune nêng kali | ing
sajroning tyas kumêpyur | sang rêtna osiking tyas | iki ngomah salah kardi
| Nawangwulan sampun kondur praptèng wisma ||

63. sampun kèndêl ingkang putra | gya sinungkên marang laki | ki agêng
nampi kang putra | ingêmban dèn arih-arih | binêkta mring pëndhapi |
kawarnaa sang rêtna yu | dangu gènira adang | wus têlas dènnya
ngratengi | gya tinumplak dangdangane maksih wêtah ||

64. gènnya adang kamanungsan | kang pari sawuli maksih | sang dyah
jêntung[2] sajroning tyas | nuli têtanya mring laki | dhuh kangmas salah
kapti | ki agêng mangsuli wuwus | lah

--- 209 ---

yayi ingsun ora | sang rêtna ngling èsmu runtik | wus dilalah tan gugu ujar
wanodya ||

65. lah mangke dika karyaa | lêsung kangge nutu pari | jêr punika karsa
dika | nglirwakkên ujaring èstri | nglampahi nutu pari | sang dèwi
langkung kaswayun | wus lami pari têlas | sangsaya susah kang galih |
mung kang raka tinutuh jroning wardaya ||

66. lamine datan winarna | gènnya adang cara janmi | sakalangkung
borosira | labête susah kang galih | ênting kang bêras pari | dumugi
pusêring lumbung | tumpukan pari têlas | rasukan nuli kapanggih | gya
ingagêm rasukan ôntarakusuma ||

67. langkung ngungun sang kusuma | lir winungu ingkang runtik | tan
èngêt marang kang putra | kang ketang cidraning laki | tan gugu ujar èstri
| katitik ing dhusthanipun | mukir nyêlêr rasukan | mila sang dyah
langkung runtik | mit ing laki sarwi ngaras ingkang putra ||

68. ramakne bèng akaria | kang bisa amomong siwi | mangke kula
lilanana | jêr dika sampun pinasthi | kramantuk widadari | ora cara
mulanipun | arêmên karya wirang | sagung basa dipun tampik | wus
pinasthi andika pisah lan kula ||

69. kang raka alon ngandika | apuranên ingsun [ing...]

--- 210 ---

[...sun] yayi | elinga mring putranira | sira tilar priye mami | tan bisa
momong siwi | kang garwa cinandhak luput | sang dyah mèsat ngambara |
ingkang raka kari nangis | kawlasarsa sêsambat kadi wanodya ||

70. dhuh-dhuh anggèr mirah ingwang | kaya apa polah mami | wong
lanang arowang bocah | ora bisa dèn tangisi | sapa ingkang nusoni | bayi
lagya pitung santun | gawanên putranira | dimèn dawa ingkang urip | yèn
wus agêng ingsun gènti kang momonga ||

71. mojar Dèwi Nawangwulan | lamun nangis ingkang siwi | gawèkêna
pêpagungan[3] | dipun unggahêna nuli | ngobonga mênyan putih | lawan
mêrang kêtan wulung | kutugêna nêng ngandhap | amasthi ingsun
dhatêngi | sang rêtnayu sampun botên katingalan ||

72. kondur marang ing kayangan | kapanggih gung widadari | sang rêtna
nuli tinulak | tan kêna wor widadari | dene sampun sêsiwi | lawan janma
wadhkipun | dadya ananggung aras | merang yèn wangsula malih |
mandhêg têngah sang rêtna mijil kang waspa ||

2. Mijil

1. tan winarna wau kang tilar sih | nênggih sang lir sinom | Nawangsasi
kang tilar putrane | dipun êmong kang rama pribadi | langkung kawlasasih
| Ki

--- 211 ---

Agêng ing Tarub ||

2. sangêt dènnya sungkawa kang galih | dene putra wadon | maksih rare
tinilar ibune | mring kayanganira widadari | mila gung prihatin | datan
wignya nusul ||

3. nanging ana ecane sathithik | ki agêng ing batos | duk murcane kang
garwa wêlinge | lamun nangis kang putra puniki | dèn unggahna nuli |
nêng panggunganipun ||

4. kyai agêng sêmana wus kardi | pêpanggungan agrong | sabên-sabên
anangis putrane | ingunggahkên mring panggunggannèki | kutug mênyan
amrik | kumêlun mring luhur ||

5. trus ngawiyat kang gônda dupa mrik | sêmana sang sinom | lamun
mambêt inggih ing gandane | gya tumurun mring panggunggannèki |
nusoni kang siwi | yèn wus tuwuk wangsul ||

6. yèn wus mênêng putra dènnya nangis | ki agêng agupoh | ingkang
putra ingambil ge-age | ingudhunkên sing panggungannèki | langkung
sukèng galih | Ki Agêng ing Tarub ||

7. duk samana wau ta sang putri | wus tan winiraos | sampun agêng ing
Tarub putrane | ingkang rama saklangkung dènnya sih | dene putra putri |
tinilar mring ibu ||

8. warnanira lan ibu tan kalih | tuhu ayu kaot | lindri-lindri

--- 212 ---

liyêp pasêmone | cahya sawang purnamaning sasi | langkung yu linuwih |
dadi panjang kidung ||

9. yèn cinôndra warna sang sukèksi | kalanturing criyos | yayah golèk
kancana rarase | sajagad rat tan ana kang sami | ngupaya sawarsi |
tangèh lamun pangguh ||

10. dèdêg sêdhêng pidêgsa mantêsi | pamulu yèn tinon | lir kancana
sinangling isthane | maya-maya sumunar blêrêngi | têmpur lan mancuring
| ujwala ngênguwung ||

11. rema mêmak ngendrawila wilis | kang sinom angrompyo | ngudhup
turi dyah athi-athine | larapannya anyela cêndhani | imba jait kadi |
sapisan kang têngsu ||

12. netra liyêp balut èsmu lindri | tuhu yèn kinaot | idêpira manêngèng
wiyate | grana rungih lungit milangêni | tanpa gantèn nanging | wus brit
lathinipun ||

13. yèn ngandika grathul èsmu manis | duk kengis kang waos | karya
tratap pra mulat gêbyare | pangarasan andurèn sajiring | alus mêmêt
ramping | uwang nyangkal putung ||

14. lunging gadhung èstu lamun mirip | lungaya sang sinom | naraju mas
karo midhangane | lir gandhewa pinênthang astèki | driji mucuking ri |
akarya wulangun ||

--- 213 ---

15. jaja wijang linut bayu wilis | maya-maya tinon | wonga-wonga
gumêbyar sorote | kang prêmbayun mungale watawis | yayah cêngkir
gadhing | babar awor santun ||

16. madyanira mêngkik amantêsi | yèn tindak sang sinom | gadrug-
gadrug gêndrèh kaduk sarèh | gêtêr goyang prêmbayunnya kalih |
wêntisnya duk kengis | tumlorong wèh gandrung ||

17. sang dyah rara sinigêg kang kawi | tan têlas kacriyos | yèn pinanjang
tan cêkap papane | anêlaskên karêtas lan mangsi | theyol ingkang nulis |
candrane tan rampung ||

18. kurang côndra apan langkung warni | wau ta sang sinom | gya
pinunggêl sinigêg kandhane | kunêng gênti wau kang winarni | kyai juru
sabin | larase lir madu ||

3. Dhandhanggula

1. kawarnaa kyai juru sabin | ingkang gadhuh sang raja pinutra |
kêlangkung asih mulane | marang sang rajasunu | kadi putra dènya
yayogi | tuwin ingkang wanodya | sihira kalangkung | dhumatêng sang
raja putra | juru sawah ngandika marang kang rabi | mangkana dêlingira ||

2. inghun arsa ngaturake pari | yèn uninga putranira radyan | sira wus
wêruh adate | iya asring kêlayu | kêdah milu marang nêgari | pan [pa...]

--- 214 ---

[...] ora kêna pisah | Ki Jaka lan inghun | mupung lagi lunga dolan |
tungkulêna anuli ki juru sabin | dandan arsa umangkat ||

3. putra wayah sadaya kinêrig | sami kinèn mikul pantunira | sakèhe
tiyang têtanèn | sêmana mangkat sampun | sarowange ki juru sabin |

warnanên rajaputra | sêmana duk rawuh | sangking dolan tanya bapa |
anauri nyai juru sêmu ajrih | anggèr sudarmanira ||

4. mring nêgara ngaturake pari | ora lawas mêngko nuli prapta | rajaputra
sru sabdane | biyung sun arsa nusul | mring si bapa marang nêgari |
angling nyi juru sawah | anglèr[4] aja nusul | tan ana rowangmu nyawa |
yêkti adoh nêgara ing Jamapait[5] | samar ana ing marga ||

5. rajaputra lumajar pribadi | datan ana wau rowangira | sinêru nênggih
lampahe | ing marga tan winuwus | rajaputra praptèng nêgari | anjujug
pagêlaran | tan ana kang wêruh | dyan putra lendhotan pundhak | sami
kagèt sarowange juru sabin | yèn ingkang putra prapta ||

6. atêtanya kyai juru sabin | aduh nyawa sapa rowangira | cang[6]
rajaputra saure | mlaku pribadi inghun | inghun [ing...]

--- 215 ---

[...sun] arsa marang sitinggil | anabuh gangsaningwang | Sêkar Dlima iku |
lawan Kyai Kêboganggang | iya iku kagungan inghun pribadi | kagèt ki juru
sawah ||

7. têbah jaja ki juru sarya ngling | aduh kaki dadi apa sira | pêsthi kêna
wasesane | mring kangjêng sang aprabu | sarayatku tan ana kari | Ki Jaka
ginendholan | andhupak anyikut | ki juru tiba kalumah | rajaputra alajêng
marang sitinggil | cinêgat ingkang jaga ||

8. kathah wadya lawan para mantri | ingkang jaga pêpakan sadaya |
ananging mêksa rahadèn | anulya dènya lungguh | rajaputra nêng
bangsal apit | panggenaning gamêlan | anuli tinabuh | kang gôngsa Sêkar
Dêlima | lawan malih Ki Kêboganggang tinitir | swara karêngèng wiyat ||

9. kapiyarsa mring sagung kang kêmit | sami kagèt sigra pinariksa | sang
rajaputra tinakèn | lah apa sababipun | dene têka akumawani |
mathengkrang lungguh bangsal | kang sarta anabuh | ing gôngsa Sêkar
Dalima | mêngko sira sun unjukke sri bupati | ora wurung tinigas ||

10. lungayanta dyan mangsuli sarwi | gumyalatah payo unjukêna | yèn
sira durung wruh mring ngong | sun lare saking dhusun | putranira [pu...]

--- 216 ---

[...tranira] ki juru sabin | Bondhan Kajawan ingwang | samana wus konjuk |
sri narendra ngungun myarsa | mring ature pra mantri kang sami kêmît |
wasana lon ngandika ||

11. lah undangên naking juru sabin | kang sinabdan sandika wus mentar |
sampun panggih lan rahadèn | dhawuhkên sabdèng prabu | rajaputra tan
swalèng kapti | wus kerit lampahira | malbèng jro kadhatun | miwah kyai
juru sawah | sampun prapta ing ngabyantarèng narpati | muka konjêm ing
kisma ||

12. lènggah jajar lawan juru sabin | kang ningali samya kagawokan |
kêdhèp tismak pandulune | pangunadikèng kalbu | bocah iki pangira mami
| maksih trahing kusuma | pratôndha umancur | sumunu wênês kang
cahya | nora wiwang dadi putraning narpati | tan môntra rare desa ||

13. sri narendra dupi amriksani | mring Ki Jaka alon angandika |
dhumatêng juru sawahe | hèn juru sawah iku | apa baya putranta yêkti | ki
juru matur nêmbah | dhuh dewaning mulku | yêkti punika sutamba | sri
narendra sigra dènnya mundhuny[7] carmin | kapriksa warnanira ||

14. nèng jro kaca pan sampun sinami | lawan Radyan Jaka datan siwah |
wawijanging citrane |

--- 217 ---

mangkana ngandika rum | juru sawah sun paring uning | ing mêngko
karsaniwang[8] | putranira iku | titipna mring Tarub mangkya |
karsaningsun nêtêpi jangkaning bumi | sira dhewe mlakua ||

15. wit ing Tarub waspada ing gaip | wus tan kilap ubênging bawana |
benjang putranira radèn | saturun-turunipun | wignya nêrahakên narpati |
Tarub kang dadi marga | ing samêngko pan wus | pêputra juga wanodya |
kang supadya dadia kang jatukrami | lan putranta Ki Jaka ||

16. lah ta uwis mangkata tumuli | sri narendra aparing pusaka | curiga
dhatêng rahadèn | tuwin wrastra[9] brana gung | radèn lawan ki juru sabin
| tur sêmbah amit mentar | wus budhal sêdarum | sarowange juru sawah |
amung radyan kêlawan ki juru sabin | têtus mring Tarub sigra ||

17. pan ingiring prêpatira kalih | sampun lêpas gènira wisata | duk prapta
wana pringgane | na janma ngadhang dlanggung | janma catur
pakaryannèki | ambegal wong lumampah | samana duk dulu | marang
radyan sarowangnya | kang durjana sigra dènira marpêki | sarwi asru
manabda ||

18. lah mandhêga kang sami lumaris | yèn aparêng sun jaluk sangunta |
payo ulungna dèn age | yèn tan antuk [antu...]

--- 218 ---

[...k] sun rêbut | radèn sugal dènnya nauri | lah sira sumingkira | ing
arsa langkung | ywa sira gêndhak sikara | kang durjana datan amangsuli
nanging | majêng ngangkat pênthungnya ||

19. tinêrajang sira radyan mantri | ingêbut pat sarwi pinênthungan | radèn
pangguh tanpa tamèng | ki juru sawah dulu | mitênggêngên sarowangnèki
| radyan narik curiga | kaprajaya sampun | kang durjana kapat pisan |
samy lalis cinuriga mring dyan mantri | nanging radèn dhuwungnya ||

20. pugut pucuk dyan ngungun ing galih | kang wusana angli[10] ipat-ipat
| ing satêrah turun ingong | ywa ana nganggo dhuwung | ingkang kaya
agêm sun iki | kêris wak-awak waja | dyan panggih ki juru | sawah gya laju
lampahnya | gêgancangan samana pan sampun prapti | dhukuh ing Tarub
mangkya ||

21. sampun tundhuk lawan sang maharsi | kyai juru sawah sêsalaman |
sampun atata lungguhe | Dyan Jaka ngraup suku | angabêkti mring sang
maharsi | wusnya bagya-binagya | kang sugata mêtû | unjukan tanapi
ganyan | sawusira nginum wedang mucang sami | matur ki juru sawah ||

22. mring sang tapa dhawuhkên sabda ji | kyagêng manggut wus tampi
sadaya | dhatêng karsaning sang rajêng |

--- 219 ---

gya nimbali kang sunu | sira Sang Dyah Rêtna Nawangsih | kinèn asaos
dhahar | pan lumadi sampun | sêgsana wus samya dhahar | dyan linorod
wusnya ngaso sawatawis | amit ki juru sawah ||

23. wus rinilan ki juru lumaris | tan winarna wau lampahira | kawarnaa sira
radèn | kang kèri anèng Tarub | maksih lènggah ngarsa sang yogi | wau
sang rajaputra | alènggah tumungkul | sang pandhita angandika | kaki
Jaka dipun kêrasan nèng ngriki | dhêdhukuh madyèng wana ||

24. rèhning mêngko dadya putra mami | iku kaki kadangmu wanodya |
juga tinilar ibune | langkung kawêlasayun | sun namani Rêtna Nawangsih |
sira kadange priya | kang putra inguwuh | rara sira marenea | lah ta iki
kakangira lagi prapti | têka saking ngumbara ||

25. amituhu Ni Rara Nawangsih | sawêlinge nênggih ingkang rama | sang
rêtna nurut kemawon | bawane maksih timur | dèrèng darbe dugi prayogi
| durung wruh subasita | sang kusuma ayu | ngajèngkên diwasa sandhang
| bangun turut Ni Rara Rêtna Nawangsih | sawulanging kang raka ||

26. sang kusuma kêlangkung dènnya sih | mring kang raka sang raja
pinutra | anênggih kakang basane | lir tunggil yayah ibu |

--- 220 ---

panyanane kadang sayêkti | milane datan taha | kusumaning ayu | tan
darbe rasa-rumôngsa | dhasar maksih timur pinaring wawêling | yèn iku
kadangira ||

27. kyai agêng angandika malih | sira anggèr sun êlih aranta | ing
samêngko karsaningong | lamun sira sarujuk | kang supaya amrih basuki |
ywa nganggo ranta lama | lamun sira rêmbug | ing mêngko sun paring
nama | Lêmbu Pêtêng ngèmpêr têdhak Majapait | radèn datan lènggana ||

28. tan kawarna ing alami-lami | sira radyan pan sampun kêrasan | ki
agêng kêlangkung sihe | marang sang rajasunu | kadi putra dènnya
yayogi | datan ataha-taha | Ki Agêng ing Tarub | dènira angaku putra |
Radèn Jaka sakalangkung wêdi asih | tansah dinama-dama ||

29. dhasar tapa tingalira sidik | sampun wikan ingêring bawana | yèn
radèn nurunkên rajèng | asmanira lêstantun | saosike wus angsal gaip |
luwih kotamanira | ya ta sang awiku | ri sêmana rajaputra | datan pègat
winulang marang sang yogi | ing wêkasaning gêsang ||

30. rajaputra sêmana winarni | dina-dina anèng ing pagagan | anênandur
pakaryane | akathah warninipun | ing pagagan dinulu

--- 221 ---

asri | kinirim lamun dhahar | yèn mulih wus surup | ri sêdhêng rêmên
têtêgal | sapakone ing guru dipun lakoni | sabên ari mangkana ||

31. kawarnaa Ni Rêtna Nawangsih | wayahira wus nêdhêng diwasa | patut
saparipolahe | sangsaya wimbuh ayu | lan kang ibu datan kêkalih | lir satu
lan rimbagan | cahyane umancur | sawêg turun ping sapisan | Dyah
Nawangsih ingkang ibu widadari | ingkang rama manungsa ||

32. Dyah Nawangsih tuhu ayu luwih | warnanira lir gambar wangunan |
pilih tumandhing warnane | yèn cinôndra sang ayu | luwih warna kurang
kêkawi | tan ana winaonan | ratuning wong ayu | mila radèn gung
kasmaran | rina wêngi tan liya kaciptèng galih | mung ari sang lir rêtna ||

33. panuwunnya pinanggihna nuli | lawan rayi Dyah Rêtna Kasihan | tan
kêlar nandhang brangtane | lamine tan winuwus | Lêmbu Pêtêng anahên
brangti | manggung anèng pagagan | kang manah mangun kung | sontên
mantuk enjing kesah | linalipur brangtane pinurih mari | malah saya
kasmaran ||

4. Asmaradana

1. sangking sangêting gêng brangti | kalimput dhahar myang nendra |
malah sipêng ing pagagèn | ing dalu praptèng raina | aminggu datan
ngucap | kalangkung [kalang...]

--- 222 ---

[...kung] susahing kalbu | mung kang rayi katingalan ||

2. punakawane sawiji | busuk tan bêtah ngêlapa | nuli pamit mring gustine
| arsa mulih marang wisma | panggih kusuma rara | gusti kula nyuwun
sêkul | sêdalul tan sagêd nendra ||

3. myang gusti tan sagêd guling | sêdalul têngga pagagan | kang padharan
sangêt luwe | ya ta ki agêng duk myarsa | ature kang parêpat | angandika
marang sunu | nini sira angirima ||

4. kakangira ora mulih | sawêngi tunggu pêngagan | sayêkti pêrih atine |
sira dhewe angirima | marang ing kakangira | kang wêruh mring kadang
sêpuh | iku gêngtining sudarma ||

5. sang rêtna gya gagorèngi | ginêlak gènira adang | wus sumêkta kesah
age | arsa ngirim mring pêngagan | ingiring kang pawongan | sêkawan wau
kang tumut | gawa sumbul lawan dhulang ||

6. kang sawiji gawa kêngdhi | malih dhulang dhêdhaharan | datan winarna
lampahe | sampun prapta ing pagagan | kêpanggih ingkang raka |
pinanggihan anèng gubug | sang dyah aris aturira ||

7. kakang alungguha dhihin | yèn luwe sira dhahara | mêngko
tumandanga manèh | Ki Jaka anuli lênggah | sumandhing Ni Kasihan |
sarwi nyêpêng astanipun | kinipatkên mring sang

--- 223 ---

rêtna ||

8. sang dyah angling esma[11] runtik | la dene agurayahan | nora prasaja
lungguhe | Ki Jaka aris ngandika | apuranên riningwang | ing sun arsa
nyandhak kêtut | kaliru mring aastanira ||[12]

9. yayi aja sira runtik | nadyan ingsun anyêkêla | mring tanganing kadang
anèm | kadang tuwa wus winênang | sun gêntining sudarma | wênang
gendhong ngindhit ingsun | mênawa sira amular ||

10. aja duka sira yayi | tulusa asih mring kadang | bènêr sira ngirim mring
ngong | aluwe wêtêng manira | sêdalu akaripan | anèng gubug tantuk turu
| asrêp akèh lêmut môngsa ||

11. sang rêtna wêlas ing galih | nuli mêtalkên kiriman | dhahar gya
linadèkake | lêlawuhira tinata | tandya wijik Ki Jaka | angandika sang
abagus | payo yayi barêng dhahar ||

12. nuruti Rêtna Nawangsih | nuli wijik milu dhahar | anglêgani mring
kadange | nanging radèn tansah ngangkah | nuruti brangtanira | dènnya
dhahar dèn dèdangu | ngêpêl sêga palêrêtan ||

13. api kasêrêtên bukti | kêpêl tinutulkên sang dyah | kêna kang kiwa
pipine | sang dyah kagèt wisan dhahar | radyan dhahar kêpêlan | sarwi
asuka gumuyu | mari sêrêt gon sun dhahar ||

14. sang dyah sangêt [sa...]

--- 224 ---

[...ngêt] dènnya runtik | merang mriksani mring radyan | saya bènèh
graitane | basane sira kakang mas | jarene kadang tuwa | dene nutul
pipiningsun | kaya wong mêtêm polahnya ||

15. pantês dudu kadang yêkti | dene nutul pipiningwang | lir nutul pipi
bojone | ujure angaku kadang | têka solah nyalunthang | sun tuturkên
ramaningsun | yêkti cabut gulunira ||

16. sang dyah kawêntar kang runtik | Ki Jaka awas duk mirsa | yèn rayi
runtik galihe | arsa rinangkul sang rêtna | sang dyah ngendrani mêtal |
saking gubug gya lumayu | laju mulih tilar rowang ||

17. pawongan kalih nututi | milu mulih gustinira | Ki Jaka gêtun manahe |
kuwanguran ing sang rêtna | kaduwung solahira | tan wurung sang rêtna
wadul | iya marang ingkang rama ||

18. Ki Jaka tan arsa mulih | merang marang sang kusuma | pawongan gya
kinèn mulèh | kang dhahar sami katilar | kunêng gènti kawarna | wau ta
sang rêtnaning rum | prapta ngarsaning kang rama ||

19. umatur wadul anangis | aturira pêgat-pêgat | mêksa ginugu ramane |
kang purwa praptèng wusana | ature sang kusuma | ki agêng ngandika
arum | nini aja rudah ing tyas ||

--- [0] ---

[Grafik]

Widadari sami siram ing sêndhang, kadhatêngan Jaka Tarub lajêng sami
mabur, Dèwi Nawangwulan kantun.

--- [0] ---

...

--- 225 ---

20. anuruta ujar bêcik | wruhanira nini sira | Ki Jaka ika yêktine | dudu
kadangira lanang | iku putraning nata | Sri Narendra Majalangu |
angèngèri marang sira ||

21. patut bae lamun wani | anggêgonjak marang sira | jêr wus lawas
anèng kene | ngèntèni biraènira | ing mêngko nini sira | wus diwasa
putraningsun | sêdhênge sira kramaa ||

22. wus pinasthi sira nini | kramantuk pacanganira | Lêmbu Pêtêng putra
rajèng | pira-pira nini sira | anaking dhudha papa | kinarsan putraning ratu
| sasat sira krama dewa ||

23. sang rêtna minggu tan angling | osiking manah mangkana |
kadimèkne si wong kae | sêmbrana angarah prana | wong uwis olih
prentah | katujune cangkêm ingsun | ora clathu nyanyah-nyunyah ||

24. kang rama waskithèng galih | duk umyat marang kang putra | kaduga
parèng sêmunè | tumungkul anggarit kisma | ing jro tyas anggraita | sarwi
nguthik jêmpol suku | pratôndha purun akrama ||

25. kunêng kang tinari krami | kawarnaa rajaputra | tinimbangan mring
ramane | sampun prapta munggèng ngarsa | kyagêng aris ngandika |
Lêmbu Pêtêng putraningsun | ingsun titip arinira ||

26. aja kapara

--- 226 ---

ing têbih | arinira Ni Kasihan | prayoga karyanên bojo | ananging dèn
sabar sira | akrama maksih bocah | acêguk bodho balilu | Ki Jaka nuwun
turira ||

27. kalangkung kawula pundhi | amba pinaringan jimat | musthika rêtna
kinaot | dadosa jimating gêsang | donya praptèng akerat | sang tapa suka
ing kalbu | myarsa aturing Dyan Jaka ||

28. ki agêng nuli nimbali | marang kulawangsanira | sami kinèn asêsaos |
pasang tratag têtuwuhan | lawan kinèn mêmajang | sampun tumandang
sêdarum | sumêkta kang pêpajakan ||

29. saksana midadarèni | kumêndhung kang pêpajakan | kadya
kaswargan yèn tinon | kumutug kukusing dupa | winor kukusing mêrang |
ngambar gandanira arum | kinarya ngundang kang garwa ||

30. Sang Kusuma Nawangsasi | datan dangu nuli prapta | manggihi
marang putrane | Kusuma Rara Kasihan | pan sampun pinaesan |
pinênganggyan adiluhung | busana saking kahyangan ||

31. gandanira amrik minging | sang dyah wuwuh ayunira | yayah murca
sapandulon | eram kang sami tumingal | marang Rara Kasihan | dene tan
ana kang wêruh | unggyannya salin busana ||

32. sawusnya dipun salini |

--- 227 ---

Kusuma Rara Kasihan | pinasrahkên mring ramane | matur Dèwi
Nawangwulan | ramakne bèng mrenea | lah punika sumbang ingsun |
kang wus kangge putranira ||

33. andika panggihna nuli | ingsun yun wruh mantuningwang | yèn wus
panggih ingsun mulèh | kyai agêng angandika | sun andhêg sira mirah |
padha momong anak mantu | sun anti-anti sihira ||

34. matur Sang Dyah Nawangsasi | inggih kawula tan kêna | atunggal lan
manungsane | luhung kalamun manungsa | kêna tunggal lan ingwang | ki
agêng mangsuli wuwus | ingsun mirah milu sira ||

35. kang rayi mangsuli malih | inggih benjang kula bêkta | yèn sampun
momong wayahe | buh-êmbuh ingkang rinasan | lah pundi
mantuningwang | kawarnaa sang abagus | sêmana wus binusanan ||

36. amangangge sarwa luwih | busana rajakaputran | tuhu bagus sira
radèn | karêngga dening busana | cahya sawang purnama | mancur
awênês sumunu | yayah murca kinêdhèpna ||

37. lir hyang asmara manjanmi | singa dulu lênglêng brôngta | wus
pinaripurna radèn | gya kairing marang tratag | tandya pangantèn kênya |
sang dyah pinêthukkên gupuh | binayangkare kalihnya ||

38. wus pagut ing ngajêng kori | pangantèn [pangantè...]

--- 228 ---

[...n] kênya lan priya | samya balangan gantale | ping tri gya pangantèn
priya | sinuci kang sampeyan | mring pangantèn kênya sampun | gya
pinondhong sang lir rêtna ||

39. wus binêkta lênggah mungging | ngajêng pasarean têngah | rêspati
lèmèk babute | sinuji isinya sêkar | andhèr pra kulawôngsa | tarap lênggah
munggèng ngayun | gya mijil kang bojakrama ||

40. jawi lêbêt wus wêradin | nutug dènnya sami boga | wus linorot
ambêngane | pangantèn asarêng dhahar | akêmbul priya kênya | lir adat
kang wus kalaku | pangantèning bôngsa Jawa ||

41. jajar lungguh pangantèn dwi | lir Ratih lan Kamajaya | ingkang mulat
brôngta kabèh | bangun turut Dyah Kasihan | tan sawala ing karsa | mila
tan taha sang ayu | wit wawuh dhingin dhasarnya ||

42. sawusnya rampung pakardi | wau ta Dyah Nawangwulan | mring
kyagêng atur pamite | samana sampun umêsat | kondur marang
kahyangan | ki agêng brôngta jro kalbu | angiwa marang ing sanggar ||

43. anênuwun mring Hyang Widhi | tulusa kang putra kênya | ywa kêna
sambekalane | unggyannya apalakrama | winongwonga mring Suksma |
inggala pêputra jalu | kang kinaot ing sasama ||

44. Rêtna

--- 229 ---

Kasihan abrangti | mriksa sêmuning kang rama | kasmaran marang ibune
| mèndêl anèng jinêm sêkar | sang rêtna tan ngandika | kang raka tansah
angimur | arum wijiling wacana ||

45. yèn sêkara dhuh maskwari | puspa dewadaru swarga | kang uwit
kancana gligèn | patra suwasa minulya | pradapa sotya rêtna | pêntil
barliyan jumêrut | nêdhêng awoh dadi dika ||

46. aja na wani ngundhuhi | ngamungna rimas rakanta | sêdyaning tyas
amba ngèngèr | makathik amanakawan | ngèstuti ing saprentah |
dhumatêng dika dyah ayu | pun kakang atadhah karsa ||

47. sang dyah angling èsmu manis | gandês tèmên yèn ngandika |
sajagad tan antuk loro | ujure angaku kadang | sun kirim nyêkêl tangan |
wêruha lamun gadêbus | môngsa sun gélêm ngirima ||

48. radyan mèsêm angarasi | sang dyah mengo nyêngkah jaja |
sinanbut[13] tangkis astane | pinangku sang dyah kalêswan | polah
pongah-pangihan | gélung lukar layon mawur | riwe mijil lir tinuras ||

49. tangèh rêngganing kang rêsmi | sinamun sami karasa | pinunggêl kawi
kandhane | atut dènnya palakrama | lir mimi lan mintuna | saparan
aruntung-runtung | ri sêdhênge pêpasihan ||

50. sigêg kang mong sukèng

--- 230 ---

galih | gènti ingkang kawarnaa | ing Palembang winiraos | Sang Dipati
Arya Damar | langkung mukti wibawa | sugih garwa donya sunu | garwane
ingkang panêngah ||

51. pêparingira Sang Aji | Brawijaya Majalêngka | Putri Cina lagya bobot |
nênggih sampun pitung côndra | marmanira binuwang | karsanira sang
aprabu | ginalih ngêndhih nêgara ||

52. mila Plembang Sang Dipati | wêlingira sri narendra | yèn durung babar
putrane | tan kalilan nunggilana | kang carêm sacumbana | ing mangke
ambabar sampun | ingkang wala mahya priya ||

53. Radèn Patah sinung nami | ambêg santa budi darma | bêlaba asih
dasihe | sabar susila ing krama | tan ana rêngatira | mêlasasih bangun
turut | sawulange ingkang rama ||

54. kang ibu tinutur malih | ing mangke sampun patutan | lan Dipati
Palembange | kakung bagus warnanira | agagah prawirèng prang |
Radyan Timbal sinung juluk | sami gênge lan kang raka ||

55. Radèn Patah langkung asih | marang rayi Radèn Timbal | tan môntra
sanès ramane | pan kadya tunggal sayayah | kang rayi nut ing raka | sami
ngaji rêmên ngèlmu | myang sinau têmbung Jawa ||

56. kêkalih lantip ing galih | sampun [sa...]

--- 231 ---

[...mpun] putus Jawa Arab | ingkang rama suka tyase | putra kalih bêt
raharja | sêmana tinimbangan | mring kang rama kalhipun | munggèng
ngarsa tur sêmbahnya ||

57. sang dipati ngandika ris | Patah Timbal putraningwang | ya anggonên
salawase | aja tungkul ulah sastra | ngaraha kawibawan | sadhengah kang
bêtja kulup | ing Palembang magangana ||

58. mêngko suwitaa kaki | mring Sang Prabu Brawijaya | iku kang masesa
angrèh | mring sagung raja dipatya | ing sabrang tanah Jawa | sira Patah
jatènipun | atmaja Sang Brawijaya ||

59. marma dadi putra mami | katut marang ibunira | tinarimakake ingong
| lagi bobot pitung côndra | marmane ibunira | tinarimakakên ingun |
salawase ngandhut sira ||

60. sri narendra asring ngimpi | pan ibunira katingal | amangku rêmbulan
gêdhe | ing sabên dalu mangkana | watire sri narendra | yèn sira ing
akiripun | ginalih ngêndhih nagara ||

61. sabab putrane sang aji | sawiji miyos pangarsa | ingkang garwa sêpuh
dhewe | iku kang ginadhang nata | anèng ing Majalêngka | Bondhan Surati
ranipun | kang badhe ngrèh tanah Jawa ||

62. pan [pa...]

--- 232 ---

[...n] wus bêgjaningsun kaki | kudu darbe putra sira | pan ingsun gadhang
ing tême | gêntèni klungguhan ingwang | mêngkua ing Palembang | sira
atmajèngsun sêpuh | ingsun titip arinira ||

63. lamun datan antuk kang sih | marang kangjêng sri narendra | arinira
kaki radèn | wênang sira ngingonana | kang putra sinung sabda | Timbal
dèn wruh ing nomipun | putra kalih sarêng nêmbah ||

64. Dyan Patah garjitèng galih | angrasa wiji binuwang | marang kang
rama sang rajèng | pinupu kang rama Plembang | sangêt panlangsanira |
dhumatêng Hyang Mahaluhur | datan ngrasa darbe jiwa ||

65. kaetang sihing dipati | apa kang sun walêsêna | dènnya momong
sarirèngong | ingsun duk durung binabar | malah praptèng diwasa | ing
mangke asung pituduh | sapangrèh datan lènggana ||

66. rajaputra sigra pamit | lawan rayi Radèn Timbal | kalilan sinangon karo
| putra kalih ngaras pada | tinimbul ibu rama | êmban pêrpat sami tumut |
wong kalih dasa tut wuntat ||

5. Pangkur

1. radèn kalih aluwaran | saking Plembang nitih baita kunthi | kalih dasa
rowangipun | sami putra dipatya | sampun layar ing marga datan winuwus
| sampun lêpas [lêpa...]

--- 233 ---

[...s] lampahira | ing Palembang wus kawingking ||

2. prapta pulo tanah Jawa | radèn kalih sigra mêngtas pasisir | ing Cirêbon
kang jinug | panggih Pangeran Modang | radèn kalih tinakenan
sêdyanipun | sang kalih matur prasaja | yèn arsa mring Majapait ||

3. pangeran sampun waskitha | lamun Radyan Patah badhe narpati | sigra
sinêmonan guyu | kanthia puruita | marang Ngampèl agampang wong
dadi ratu | langkung nuwun rajaputra | sêmuning tyas walanggalih ||

4. sêdalù anèng jro pura | radyan kalih jêng pangran sukèng galih |
akathah piwulangipun | kalih ingakên kadang | sarêng enjing nuli pamit
sang abagus | sêmana sarêng manêmbah | sampun mijil saking puri ||

5. rajaputra lajêng budhal | sampun prapta ing wana Roban sami | tiyang
kalih dasa tumut | lêstari lampahira | wana Roban angkêre kêlangkung-
langkung | apan kathah janma begal | miwah kathah sarpa mandi ||

6. wêrite kagila-gila | pan akathah jim setan tuwin dhêmit | tan antara na
kadulu | kang durjana ambegal | janma catur angadhang munggèng
dêlanggung | anguwuh kinèn mandhêga | marang kang samya lumaris ||

7. pangarsanira satunggal |

--- 234 ---

maksih lare Ki Wana ingkang nami | desa Salam wismanipun | lola tan
darbe bapa | rare yatin nging digdaya têguh timbul | yèn angsal donya
begalan | pinaringkên janma miskin ||

8. datan rêmên rawat donya | amung rêmên ginunggung wani mati | yèn
begal ngalang dêlanggung | rêmên begal wong kathah | Radèn Patah kalih
dasa rowangipun | binegalan wong sêkawan | rajaputra mandhêg aglis ||

9. sirèku arsa punapa | janma catur angandhêg wong lumaris | Ki Wana
asru amuwus | sun jaluk sangunira | sun paringkên mring sagung pra
miskin iku | ingkang ora bisa mangan | têlungane sira sugih ||

10. Rahadèn Patah ngandika | bènêr sira ing sun kang luwih sugih | radèn
ngambil usus-usus | kang isi dinar dirham | kinalungkên Ki Wana kang
usus-usus | sanalika ingkang begal | sami datan bisa angling ||

11. saking mandi kang kamayan | mitênggêngên wuta tan wêruh margi |
Radèn Patah nuli laju | tindak sarowangira | samantara saonjotan
têbihipun | kawarnaa Kyai Wana | Salam susah ing panggali |

12. rumôngsa kenging rubeda | wilalatnya risang satriya kadwi |
kêtanggor janma linuhung | tapi [ta...]

--- 235 ---

[...mpi] dhêndhaning Suksma | samya miris manahira janma catur | ing
sajroning tyas nalôngsa | pan sarwi marêbês mili |

13. asêsambat bapa biyang | sru karuna janma sêkawan sami | sadaya
pating salênggruk | tan dangu antaranya | pan wus antuk apuranira Hyang
Agung | sampun mulya wutanira | langkung ngungun jroning galih |

14. tumuli angulap-ulap | angulati parane kang lumaris | wus waspada
tingalipun | Ki Wana sarowangnya | pirêmbagan sêdayane arsa nusul |
dhumatêng raja pinutra | tan ana sulayèng galih |

15. nir tyasira Kyai Wana | ngucap tobat begala malih-malih | janma catur
tandya nusul | andhèrèk Radèn Patah | sarwi matur asrah tobat mring
sang bagus | ngaturakên pêjah gêsang | tiyang sêkawan nututi |

16. rajaputra angandika | sun tarima Ki Wana milu mami | sira sun paringi
juluk | arana Wanasalam | dene sira Wana Salam asalipun | Ki Wana
nuwun turira | sakarsa dhatêng nglampahi |

17. nuli lajêng lampahira | Wanasalam ngawula mring sang pêkik | ing
sapanan atut pungkur | sampun lêpas lampahnya | tan winarna lamine
anèng dêlanggung | wus rawuh jajahanira | nêgara [nêga...]

--- 236 ---

[...ra] ing Majagêtir |

18. kari lakon tigang dina | praptanira nêgara Majapait | sêmana lèrèn
nèng dlanggung | Radèn Patah ngandika | mring kang rayi mangkana
pamuwusipun | yayi padha andum lampah | sira banjura angabdi ||

19. mring Sang Nata Brawijaya | amaganga mênawa olih kardi | aja
walanggalih mring sun | magang ana Palembang | iya sira ingkang darbe
warisipun | dene yayi sarirèngwang | nutugakên dadi santri ||

20. kang rayi nungkêmi pada | sru karuna asambat kawlasasih | kang raka
ngling sarwi ngrangkul | yayi aja karuna | lah turutên amrih arja ujar
ingsun | lamun ingsun barêng magang | mring sira ngewuh-ewuhi ||

21. dene wong kang kalih dasa | ya gawanên mring nagri Majapait |
sampun têlas wulangipun | kang rayi kinèn mangkat | pamit nêmbah kang
rayi mangkat rumuhun | lawan rowang kalih dasa | lampahnya mandhêg
tumoli ||

22. wus antara saonjotan | kang lumaku nuli radèn lumaris | Wanasalam
ingkang tumut | miwah êmban sajuga | rajaputra mring pêsantrèn
karsanipun | dhumatêng ing Ngampèldênta | wirandhungan lampahnèki ||

23. kunêng kang lagya lumampah | kawarnaa Jêng Sunan
Ngampèlgadhing |

--- 237 ---

wus lami dènnya dhêdhukuh | sêmana wus tumêngkar | langkung arja ya
ta wau dhukhipun | agêmah dadi nagara | kathah ingkang sabat murid ||

24. putra kang sêpuh martapa | angaluwat antuk catur dasa ri | katarima
mring Hyang Agung | kungas istijratkira[14] | dadya ratu waliolah tur
pinunjul | winênang ngrèh pra oliya | Prabu Satmata wêwangi ||

25. ngêdhaton ing Giripura | para mukmin gung prapta gurunadi | lawan
malih arinipun | Sèh Bênthong kang pêparap | wus jumênêng susunan
nèng nagri Kudus | nênggih putra nomêr tiga | jumênêng ing Wuryagiri ||

26. nama Maolana Iskak | putra Ngampèl kang putri tan winarni | ya ta gènti kang winuwus | Kangjêng Susunan Benang | tan pêputra nêdya wadat karsanipun | malah jabut surasmara | dadya dhuwung pusaka ji ||

27. Kyai Kalamunyêng nama | pinaringkên marang Jêng Sunan Giri | sigêg gènti kang winuwus | wau ta rajaputra | sampun rawuh ing Ngampèl panggih sang wiku | sang atapa wus waskitha | saliring kang lagya prapti ||

28. lajêng dipun ambil putra | pinanggihkên lawan putrane putri | tan winarna laminipun | atut apalakrama | Kangjêng Sunan ing Ngampèl asih kêlangkung | dhasar wus [wu...]

--- 238 ---

[...s] wruh gaibing Hyang | rahadèn badhe narpati ||

29. samana raja pinutra | tinimbangan sampun sumaos ngarsi | angandika sang awiku | Ki Patah putraningwang | sun asung wruh margane wong dadi ratu | mentara ngalas Bintara | ngupayaa glagah wangi ||

30. yèn katêmu wismanana | dhêdhukuha kang nêmên angimani | iya mênawa katêmu | jangjine ing Bintara | amiwiti kêraton Islam karuhun | dèn asih marang oliya | anuli yasaa masjid ||

31. kang putra matur sandika | atur pamit sarimbit angabêkti | sampun lèngsèr saking ngayun | praptèng jawi gya budhal | tindakira ngalor ngulon radyan bagus | sarimbit lan garwanira | Ngampèldênta wus kawingking ||

32. ing marga datan winarna | lampahira wana Bintara prapti | amiwiti babat sampun | datan lami wus têlas | sabat murid sadaya pan sami tumut | karya wisma ngirit tiyang | sami manut gama suci ||

33. langkung arja dhukuhira | rajaputra têtêp agama suci | nuli karya masjidipun | kathah ngulama prapta | nanging datan sowan marang Majalangu | kunêng dhukuh ing Bintara | kawarnaa Majapait ||

34. Sri Narendra Brawijaya | amiyarsa wartane

--- 239 ---

kang sayêkti | ing Bintara baris agung | sang nata sayêmbara | marang
wadya datan ana ingkang sanggup | anyêpêng baris Bintara | sagung
wadya Majapait ||

35. kawarnaa putra Plembang | Radèn Timbal sampun katur sang aji |
katrima pêmagangipun | kinarya lurah magang | anyaguhi sayêmbaranya
sang prabu | rahadyan nuli dinuta | kinèn nyêpêng ingkang baris ||

36. rahadèn sêmana budhal | sarowange wong magang agêng alit |
wolung dasa kathahipun | sanès paringing nata | cinacahkên wolung atus
gunging wadu | sumêkta gêgamanira | wus lêpas dènnya lumaris ||

37. ing marga datan kawarna | wisatanya wana Bintara prapti | Dyan
Timbal anuli malbu | marang sajroning kitha | amung wadya kawan dasa
ingkang tumut | katur marang narpatmaja | yèn putra Palembang prapti ||

38. ki patih sigra parentah | marang wadya tan kêna lawan jurit | kinèn
mire marang pungkur | nuli mijil Dyan Patah | sampun panggih lawan rayi
datan pandung | Rahadyan Timbal lumajar | mangaras pada sang pêkik ||

39. apan sarwi matur nêmbah | dhuh kakang mas amba dinutèng aji |
kinèn nyêpêng baris agung | awit tan sowan nata | gunging wadya datan
wontên ingkang sanggup | amung [a...]

--- 240 ---

[...mung] kawula kang sagah | anyêpênga ingkang baris ||

40. botên nyana yèn paduka | ingkang baris wana Bintara mangkin |
ingkang raka ngandika rum | ora nêdya ragèngwang | madêg baris mung
babat wana kang suwung | arjane katur narendra | kang suwung sun
amrih isi ||

41. kang rayi umatur nêmbah | dhuh kakang mas swawi sumiwèng aji |
Bintara yogi tinêmbung | dhumatêng sri narendra | inggih kula ingkang
matur mring sang prabu | yèn wikan lamun kakang mas | mêsthi èngêt
darbe siwi ||

42. rajaputra osik ing tyas | dipun rasa lêtês aturing rayi | Radyan Patah
kerit sampun | dhumatêng Majalêngka | para murid mukmin santri samya
tumut | tan winarna lampahira | ing Bintara wus kawingking ||

43. arêmbên dènnya lumampah | awit radèn samarga gunêm pikir | tan
ana sulayèng kayun | wus laju lampahira | gunging wadya sami suka
manahipun | dene wurung gènnysa prang | mungsuhe têluk pribadi ||

44. ing marga datan kawarna | sampun prapta nagri ing Majasait[15] | nuli
katur sang aprabu | rajaputra ngandikan | sri narendra sêdhêng miyos
sitiluhur | sineba putra santana | paglaran supênuh nangkil ||

45. sagunge para punggawa |

--- 241 ---

pra dipati bupati miwah mantri | pandêlêgan miwah êmpu | Kya Patih
Gajahmada | tinimbangan lawan ingkang lagya rawuh | wus munggèng
ngabyantarendra | tiga sarêng atur bêkti ||

46. Dyan Timbal umatur nêmbah | dhuh pukulun amba atur udani | kang
ginalih baris agung | dede liyan dêrayan | inggih kakang Radèn Patah
namanipun | tunggil ibu sanès bapa | lawan kawula dewaji ||

47. mijil saking putri Cina | duk kêpanggih lawan pun bapa gusti | sampun
bobot pitung têngsu | babar pun kakang mangkya | botên lami nuntên
kawula sumundhul | mila pisah lawan amba | pun kakang arêmên ngaji ||

48. wignya angimani tiyang | babat wana kaisèn tiyang santri | sagung
wana ingkang suwung | sampun kaisèn tiyang | arjanipun sumôngga ing
karsa prabu | pun kakang sadarma têngga | mung klilana yasa masjid ||

49. nuwun têtêping agama | anglurahi di dalêm tiyang santri | ya ta wau
sang aprabu | nuli mundhut paesan | tandya ngilo kapriksa wayanganipun
| sinami lan rajaputra | tuhu kêmba ingkang warni ||

50. sri narendra angandika | lah bagea putrèngsun kaki santri | rajaputra
matur nuwun | kapundhi ing mastaka | pangandika padukendra [padu...]

--- 242 ---

[...kendra] kang dhumawuh | sang nata malih ngandika | ingkun anggèr
angidèni ||

51. dènira ababat wana | mêngko arja isi wong gama suci | nanging sebaa
maringsun | sira ingkang momonga | lawan sira arana dipati mungguh |
susunan anata praja | Bintara ingkang nêgari ||

52. lah têtêpa gama mulya | sasênêngan ingkun ora nglarangi | rajaputra
matur nuwun | sarwi manguswapada | ya ta malih angandika sang aprabu
| Si Timbal sun junjung lênggah | nêng Têlung nama dipati ||

53. arana Ki Pêcattôndha | lan kancamu wong magang gêdhe cilik |
unggahna samurwatipun | ingkun pitayèng sira | tur sandika wau kang
sinungan wuwus | wus rampung karsa narendra | sigra kondur ngênypuri
||

54. sarawuhing dhatulaya | sri narendra pinêthuk pramèsuari | sampun
lênggah sang aprabu | paring wikan ing garwa | saniskara ing purwa
wusananipun | kunêng gènti kawarnaa | ingkang sowan bubar mulih ||

55. Sang Adipati Bintara | sampun pamit marang rêkyana patih | tanapi
Dipati Têlung | sawadya sami suka | kur-ungkuran mring Dêmak lawan
mring Têlung | para santri suka-suka | aslawatan urut margi ||

56. kunêng kang antuk nugraha | tan winarna praptanira [prapta...]

--- 243 ---

[...nira] nagari | ya ta gènti kang winuwus | kawarna putra Tuban | Sèh
Mêlaya kang mardika mring Hyang Agung | langkung bêkti mring Hyang
Suksma | datan tolih garwa siwi ||

57. saênggèn amatiraga | midêr ing rat anjajah wana wukir | anêpi gotaka
samun | gung guwa linêbonan | ing pasantrèn jinajah sadaya sampun |
katrima marang Hyang Suksma | tan kilap ing agal alit ||

58. sêmana ngidêri jagat | Sèh Mêlaya ngubêngi ing pasisir | wus rawuh
pasisir kidul | wruh janma mangun tapa | nêng sajroning guwa langse
pêrnahipun | pêparapipun kang tapa | Sèh Maolana Mahgribi ||

59. wus lami gènira tapa | anèng guwa pitêkur datan muni | botên dhahar
tanpa nginum | kuku remane panjang | tanpa nyandhang kang cawêt wus
ajur mumur | Sèh Mêlaya eram mulat | kaelokaning Hyang Widhi ||

60. Sèh Mlaya mangunandika | luwih têmên kaelokaning Widhi | sang tapa
sandhange mumur | kuku remanya panjang | tanpa dhahar suprandene
datan lampus | bangêt têmên kinasihan | marang Hyang Kang Maha Suci
||

61. ing ngêndi pinangkanira | ingkang tapa ragane dèn pêpati | kang tapa
angling jro kalbu | hèn hèn ywa tumbuh mringwang |

--- 244 ---

Sèh Mêlaya aja ngregoni maringsun | tan kobêr nyapa mring sira | lagya
ngandikan mring Widhi ||

62. Sèh Mêlaya datan samar | saosike kang tapa wus udani | ngrasa
kasoran pandulu | kaluhuran ing cipta | Sèh Mêlaya saking guwa nuli laju |
lumêstantun tindakira | nurun èrèng-èrèng wukir ||

63. sampun lêpas lampahira | Sèh Mêlaya prapta ing Gunungjati | arèrèn
anèng alurung | nuju marga prapatan | apan sare ambathang nêng têngah
dlanggung | dakare ngadêg lir gana | janma langkung merang uning ||

64. katur marang Pangran Modang | lamun wontên tyang tilêm anèng
margi | kang dakar ngadêg kêlangkung | pangran nuli parentah | marang
garwa kinèn godha kang nèng lurung | garwa sêkawan wus dandan | lir
rarasing gula milir ||

6. Dhandhanggula

1. garwa catur samana wus mijil | prapta lurung pêrnahe kang nendra |
ginugah pan eca sare | sêdalû anèng lurung | garwa catur anggoda sami
| nanging datan kagoda | ingkang tapa turu | dakare malah anendra |
amangkêrêt kêlangkung dènira alit | pra garwa mundur merang ||

2. praptèng pura umatur ring laki | ngaturakên solahe anggoda | tan
pêpayon panggodhane | malah dakar [da...]

--- 245 ---

[...kar] kang wungu | amangkêrêt sak cabe aking | pangeran anggraita |
yèn wali kang turu | jêng pangran nuli tumêdhak | marang lurung dèn
iring gung para santri | rawuh gèn Sèh Mèlaya ||

3. uluk salam jêng pangeran prapti | Sèh Mèlaya anauri salam | nanging
maksih eca sare | pangeran malah tunggu | anèng lurung angsal sapta ri |
nuli wungu kang nendra | asalaman sampun | Sèh Mèlaya angandika |
ingsun turu ana ing marga puniki | tan wêruh yayi prapta ||

4. alon matur Pangran Wukirjati | dhuh kakang mas suwawi katuran |
kampir dhumatêng kadhaton | Sèh Mlaya ngandika rum | sun tarima sihira
yayi | pan ingsun bujung lampah | nênggih arsa nglangut | anusul ing
guruningwang | Sunan Benang ingkang lagya mungga khaji | yayi kèria
wiryas ||

5. Sèh Mèlaya pan laju lumaris | jêng pangeran lajêng kondur sigra |
kêlangkung ngungun galihe | kunêng gènti winuwus | Sèh Mèlaya kang
arsa khaji | sampun nyabrang samodra | pulo Ulih rawuh | lampahnya nuli
kêpapag | kèlawan Sèh Maolana Mahgêribi | Sèh Mlaya tinakonan ||

6. lah ta jêbèng arsa marang ngèndi | dene sira anyabrang samodra |

--- 246 ---

Sèh Mêlaya ris ature | kawula arsa nglangut | marang Mêkah amungah
khaji | angling Sèh Maolana | bêbakal sirèku | wong wus antuk kanugrahan
| tingal padhang saciptanira wus dadi | arsa khaji mring Mêkah ||

7. basa Mêkah dudu kakbah jati | Mêkah tiron tinêngêran sela | kang
gumantung tanpa canthèl | ya patilasanipun | Jêng Ismangil duk kala lair |
Nabi Brahim kang yasa | sarengat kang tinut | dene wong ahli makripat |
nut ing keblat Mêkah kabèh asalnèki | asline jati suksma ||

8. uwis ana ing sira pribadi | kang linuwih amurba masesa | anèng sira
paesane | pama ngilo sirèku | nèng jro carmin katingal kalih | jatine mung
sajuga | wayangan kadulu | datan dulu kang wayangan | saking tan wruh
marang kang ngilo jro carmin | lah wis jêbèng balia ||

9. Sèh Mêlaya kacaryan sabdaning | mêngdhak arsa mangaras ing pada |
sang tapa nampi astane | apan sarwi amuwus | aja jêbèng sira tan kêni |
iya sapadha-padha | kewala sirèku | pan wali panutuping rat | pra oliya
datan ana ingkang sami | lah wis ingkun tarima ||

10. Sèh Mêlaya matur têtanya ris | tuwan pundi tuwin [tuwi...]

--- 247 ---

[...n] sintên tênggran | kula mène arsa dhèrèk | ngandika sang awiku | sun
Sèh Maolana Mahgribi | ngasrama Pêmancingan | Ngarab asal ingkun | ora
susah milu mringwang | sira arsa gêguru marang ing mami | ki jêbèng ora
kêna ||

11. lamun sira ora dèn lilani | marang gurunira kang kawitan | sun wênang
mlambang bae | bêcik wong sêtyèng guru | tinarima marang Hyang Widhi
| lah sira mêtapaa | anèng kali tunggu | wot galinggang anèng wana |
adhukuha têtahanên gurumu kaki | kang cêdhak tan gêpokan ||

12. ingkang adoh tan wangênan kaki | nyatakêna kang kongsi satmata |
kang kêrasa ing dhèwèke | lah uwis tutur ingkun | jawab[16] asta laju

lumaris | kacaryan Sèh Mêlaya | kèri nèng dêlanggung | nunggoni woting
galinggang | anèng wana datan dhahar miwah guling | asèndhèn wot
galinggang ||

13. satus dina kramatira mijil | punang glinggang ngrêmbuyung ronira |
ngaubi gènira sèndhèn | sing marmaning Hyang Agung | kayu mati
sinèndhèn urip | warnanên Sunan Benang | ya ta ingkang langkung |
anguwot anèng galinggang | sarêng mirsa kang rayiendra nèng kali |
winungu uluk salam ||

14. Sèh Mêlaya sarêng aningali | mring kang raka

--- 248 ---

gupuh ngaras pada | Jêng Sunan Benang sabdane | paran karsanirèku |
dene turu nèng pinggir kali | yèn mangkanaa sira | sun wèhi jêjuluk |
Susunan ing Kalijaga | para santri sadaya sami nêksèni | Sèh Mlaya nama
sunan ||

15. sun idèni sira anèng ngriki | dhêdhukuha nèng pinggir narmada |
garwanta sun susulake | lamine tan winuwus | Sunan Benang milu babati |
nuli karya pratapan | dhepokira patut | ri samana Sunan Benang |
angandika mring kang rayi Sunan Kali | payo mring Giripura ||

16. kang nglurahi sagung para wali | Sunan Giri Sang Prabu Satmata |
ingkang ngrèh pra wali kabèh | padha nyuwun pangèstu | tur sandika Jêng
Sunan Kali | nuli sami umangkat | murit ngiring sagung | ing marga datan
winarna | sampun lêpas jêng sunan gènnya lumaris | rawuh Giri
kêdhatyan ||

17. sampun panggih lan Jêng Sunan Giri | sami jawab asta sêsalaman |
pêpak para wali kabèh | Jêng Sunan Benang matur | marang raka Jêng
Sunan Giri | kawula tur uninga | jangkêp wali wolu | pun adhi ing Kalijaga |
kang jumênêng wali panutuping Jawi | katrima mring Hyang Suksma ||

18. Sunan Giri nabda angidèni | jumênênge Sunan Kalijaga | wus mupakat
[mupaka...]

--- 249 ---

[...t] wali kabèh | Jêng Sunan Kali matur | marang raka Benang sang yogi |
kawula nama sunan | dèrèng angsal tuduh | amba nyuwun pangawikan |
Sunan Ngampèl nambungi ngatag kang rayi | lah nuli kawêjanga ||

19. Sunan Benang sampun atur pamit | marang raka Sang Prabu Satmata
| miwah marang Sunan Ngampèl | salaman sigra mundur | sarawuhe
pakuwon masjid | kangjêng sunan mring rawa | wus wahana prau | miwah
Sunan Kalijaga | tunggil prau ri sêmana sampun milir | nanging rêmbês
kang palwa ||

20. Sunan Benang ngandika mring rayi | hèh ta jêbèng rêmbês kang baita
| popokên ing lëndhut bae | kang rayi sampun mundhut | ingkang lëndhut
pinopok nuli | mari rêmbês kang palwa | winêlahan gupuh | baita sampun
manêngah | têngah dalu marêngi purnamasidhi | Sunan Kali winêjang ||

21. pamêjangnya sinêmon kang rayi | damar murup pancêre sakawan |
yèn mati nyang di parane | kang rayi nuli matur | kalêrêsan dènnya
nampèni | lêpasing panggraita | tanduk lawan wahyu | kasêksèn dening
Hyang Suksma | pratandhane sinihan marang Hyang Widhi | coblong
datanpa cahya ||

22. langkung nuwun Kangjêng Sunan Kali | atur sêmbah sarwi ngaras
pada | Jêng Sunan [Suna...]

--- 250 ---

[...n] Benang sabdane | yayi dèn awas emut | aja kongsi kawêdhar nglathi
| iku sabda larangan | yèn kawêdhar ngrungu | mring sagunging kang
tumitah | yèn mangêrti dadi manungsa sêjati | kapis kupur sampurna ||

23. nuli ana cacing lur mangêrti | ing wangsiting jêng sunan sasmita |
cacing katut lèmpung popok | Jêng Sunan Kali mundhut | ingkang lëndhut
katutan cacing | wor popoking baita | mangêrti kang sêmu | sêmuning jati
manungsa | nulya nguwuh amba mangêrti mring wangsit | nyuwun
apuruita ||

24. kangjêng sunan kagèt duk miyarsi | angandika sapa ingkang ngucap |
dene tan katon warnane | punang cacing umatur | kawula lur mangrêti

wangsit | jêng sunan duk sasmita | tinampan kang sêmu | sêmuning
janma utama | inggih kula tumut tampi sasmita di | ngraos dados kawula
||

25. kangjêng sunan angandika malih | wus pinasthi kodrating Pangeran |
cacing lur ngrungu dadi wong | mandi sabda sang wiku | cacing nulya
awarni janmi | lênggah angaras pada | ngandika sang wiku | iya wus
ingsun tarima | sêtyanira kang satuhu lawan mami | arana Sitijênar ||

26. aparapa Lêmah Bang ya bêcik | de asale saka lêmah abang | kang
sinung ling tur sêmbahe | angandika sang wiku |

--- 251 ---

mring kang rayi jêng Sunan Kali | iku yayi pratôndha | luwihing Hyang
Agung | tan kêna kinayangapa | yayi sira duk durung winêjang uwis |
sinêlir mring Hyang Suksma ||

27. duk kalane sira arsa khaji | kinèn bali mring Sèh Maolana | sira nèng
kali asare | têtung côntra pan antuk | krasanira sadhela guling | yèn aja
sinêlira | yakti ajur mumur | yayi jiwaraganira | pratandhane saniskaraning
Hyang Rawi | coblong datanpa cahya ||

28. lêhêng sira yayi wus sinêlir | mring Hyang Suksma langgêng ananira |
badan ta langgêng anane | urip tan kêna lampus | urip datan ana nguripi |
donya praptèng ngakerat | langgêng ananipun | saguning para oliya |
durung ana kang nyabrang sêgara pati | patitis kaya sira ||

29. ingsun iki upamane yayi | ngadhêp madu nèng sajroning kaca | mung
wêruh mayane bae | durung wruh rasanipun | sun kapengin lir sira yayi |
nyabrang sagara rahmat | yèn kêna riningsun | ingsun yayi pirsakêna |
paribasan kêbo anusu mring siwi | guru mruwitèng sabat ||

30. Sèh Mêlaya umatur ngabêkti | gih sumôngga angatêr kewala |
marganipun gampil angèl | tan kêna was ing kalbu | langkung dhêmit[17]
[dhê...]

--- 252 ---

[...mit] rungsit kang margi | sigra ngadêg kalihnya | jêng sunan manêkung
| asta samya ngrangkul madya | suku jajar nutupi tingal sajati | sakêdhap
praptèng Mèkah ||

31. Sitijênar tumulya nututi | nut ing guru ngadêg suku tunggal | matèni
pôncadriyane | sakêdhap netra rawuh | praptèng Mèkah sampun
kapanggih | lan sagung waliyolah | jangkêp wali wolu | pan samya salat
Jumungah | mungguh kutbah wali wolu sinung wangsit | kasanga Sitijênar
||

32. wali wolu wus wênang ngidèni | masjid Mèkah ginambar mring Dêmak
| pinaring surat kutbahe | bakda Jumungah mantuk | para wali sidhakêp
prapti | ing Jawa jujuk Dêmak | sêsalaman sampun | lawan Dipati Bintara |
nata praja nulya ingaturan linggih | pra wali sampun lênggah ||

33. gung ngulama miwah para santri | ugi prapta tatrap tata lênggah |
myang santana Bintarane | sumewa munggèng ngayun | nèng wurining
kang para mukmin | sêmana Sèh Molana | apêparing dhawuh | dhumatêng
sang adipatya | paring priksa benjang ri adêging masjid | tuwin wontèning
wrêksa ||

34. calon sakagurunirèng masjid | ingkang badhe kabubuh ngupaya | para
wali kawolune | dene sadayanipun | pinasrahkên mring

--- 253 ---

sang dipati | lan sagung pra ngulama | de kang punggawa gung | amung
kinèn lèladia | duk samana kang pirêmbag sampun gilik | tandya sami
bubaran ||

35. para wali sampun budhal sami | nuli laju nênggih angupaya | kang
badhe sakagurune | sowangan tindakipun | kur-ungkuran dènnya lumaris |
kawarna wisatanya | mangalor mangidul | ana ngulon wênèh ngetan |
kawarnaa tindaknya Jêng Sunan Kali | prapta madyaning wana ||

36. madik kayu kang lurus witnèki | tinêngêran kang calon sêsaka | catur
nênggih bubuhane | jêng sunan nuli dulu | ana kodhok minôngsa muni |
kangjêng sunan ngandika | wijiling sabda hu | kang sarpa nglêpèh

mangsanya | kang canthoka ucul manculat atêbih | umatur ponang sarpa
||

37. kangjêng sunan punapaa gusti | ngandika hu ucul mangsan amba |
basa punapa artine | jêng sunan ngandika rum | ya ulunên mangsanira
glis | ingkang sarpa wus kesah | canthoka gya ngayun | umatur dhuh
punapaa | ngandika hu luwar kawula asakit | punapa tuhu luwar ||

38. kangjêng sunan awêcana aris | têngêsira uculêna sarpa | aja môngsa
sêlawase | kanang canthoka nuwun | datan sagêd malês sih gusti |
namung pakarya [pa...]

--- 254 ---

[...karya] tuwan | arsa ngusung kayu | kawula sagah ndhatêngna | mring
Bintara yèn sampun glondhongan dadi | kawula kang bêktakna ||

39. ngling tarima Kangjêng Sunan Kali | canthoka wus mentar saking
ngarsa | tan antara wontên manèh | janma wrêdha alangkung |
amangangge yayah narpati | prapta ngajêngan sunan | kèndêl tata
lungguh | Sèh Mêlaya kagyat mulat | ris têtanya marang ingkang lagya
prapti | mangkana ngandikanya ||

40. dhuh pukulun amba nilakrami | ing paduka pundi kang pinôngka |
kêlawan sintên asmane | paran sinêdyèng kalbu | kang tinakon mangsuli
aris | yèn sira tumbuh mring wang | tilas ratu ingsun | kang mêngku praja
Ngamarta | pambarêping Brata Pandhawa wak mami | juluk
Darmakusuma ||

41. ing samêngko sêdyaningsun kaki | yun ngupaya sampurnaning laya |
dene dewa sasmitane | yèn sun bisa kêpangguh | lawan janma panutup
wali | kang aran Sèh Mêlaya | ing kono ragèngsun | nêmahî sampurnèng
laya | awit wali iku kang wignya jarwani | marang pêpundhèn ingwang ||

42. pusakèngsun pêparing dewa di | ingkang aran srat Kalimasada |
pramila ragèngsun kiye | tansah mlaya bumi gung | yun nyatakkên kang
sasmita di | jêng sunan dupi myarsa |

--- 255 ---

pangandika prabu | agupuh mangaras pada | sarwi matur kasinggihan sri
bupati | sangêt kapasang yogya ||

43. gih kawula punika kang nami | Sèh Mêlaya panutup oliya | lir kang wus
kasbut jarwane | sasmitaning dewa gung | Sri Ngamarta dupi miyarsi |
mring aturing jêng sunan | cumêplong tyasipun | tan taha sukèng wardaya
| marwatatma sarwi angandika aris | yèn mangkonoa sira ||

44. kang sayogya nguntapêna kaki | praptaningsun ing jaman kasidan |
sampurnaning pralayèngong | ananging mêngko kulup | ing.sun nêdha
pruita dhingin | marang ing jênêngira | jêng sunan umatur | kawula
lumiring karsa | gya winirit Sri Ngamarta gama suci | tuwin sinungan jarwa
||

45. kang Pustaka Kalimasadèki | ri wusira kacakup sadaya | rumasuk ing
jro kalbune | samana sampun layu | Sri Narendra Ngamarta mangkin |
sinuci sanalika | gya sinare sampun | anèng samadyaning wana | sabat
muritira jêng Sinuwun Kali | kang sami ngupakara ||

46. duk sêmana wus rampung ing kardi | Sèh Mêlaya lajêng tindakira |
sigra kêpapag rayine | Rasawulan sang ayu | ingkang tapa ngidang wus
lami | kalimputing wardaya | supe prajanipun | wus awor kidang
mênjangan |

--- 256 ---

supe kadang cinêluk lumayu gêndring | ngungun kangjêng suhunan ||

47. kangjêng sunan anuli kêpanggih | lan muridnya kang aran Ki Supa |
turuning êmpu kinaot | angsal sih gurunipun | mila Supa sêkti nglangkungi
| lan malih muridira | wong mukmin satuhu | Iman Sumantri arannya |
inggi sêkti jêng sunan muridnya kalih | binêkta bujung kidang ||

48. kinèn sangu kêpêlan rijêki | pan kinarya ambalang kang tapa |
kangjêng sunan wangsul age | wus prapta prênahipun | kidang èstri anèng
wanadri | Sang Rêtna Rasawulan | kêpanggih lumayu | binujung kacêgat-
cêgat | dipun balang kêpêlan sêga kaping tri | nutut sampun kêcandhak ||

49. Jaka Supa kang mikut sang dèwi | Rasawulan supe datan nyundhang |
budi cinêkêl astane | ri sêmana tinimbul | mring jêng sunan sinêdya eling |
bêntinge Jaka Supa | tinapihkên sampun | pêpinjung kasmêkanira | duk
sêmana sang rêtna cinêluk eling | ngrangkul padaning raka ||

50. ingkang raka angandika aris | yayi dèwi sira aluwara | muliha mring
Tuban mangke | lan krama ariningsun | lan Ki Supa warnane pêkik | iku
kang asung pangan | mring cira[18] riningsun | lan surute

--- [0] ---

[Grafik]

Wiwahan panggihing pangantèn Radèn Bondhan Kêjawan dhaup angsal
Dèwi Nawangsih.

--- [0] ---

...

--- 257 ---

kangjêng rama | iya sira mêngkua nêgara Tubin | Supa karyanên bapa ||

51. matur nêmbah sandika sang dèwi | kangjêng sunan angatêr mring
Tuban | datan kawarna lampahe | nêgara Tuban rawuh | panggih lawan
kang ibu sori | Sang Dyah Rêtna Dumilah | asru dènnya muwun | rinangkul
kang putra kênya | angandika marang putranira kalih | tan nyana maksih
gêsang ||

52. dene tita tan ana pawarti | tata tita kang nangisi putra | kang putra
atur sêmbahe | mring rama lawan ibu | sang dipati ngandika malih | dhuh
putraningsun nyawa | insun uwis sêpuh | aja sira lunga-lunga |
tunggonana nêgaranira ing Tubin | yèn insun praptèng lena ||

53. tur sandika Kangjêng Sunan Kali | nuli matur angaturi priksa | ing
sasolah sarirane | katur sadayanipun | saking purwa wusana prapti | lan
solahe arinya | katur rama ibu | langkung ngungun sang dipatya | duk
miyarsa turing putra ngrês kang galih | kumêmbêng waspanira ||

54. sampun tâlas ature kang siwi | sang dipati manggihkên kang putra |
binojakrama panggihhe | Ki Supa lan sang ayu | kang ningkahkên jêng
Sunan Kali | kang mangku Jaka Supa | gih pêpatihipun | sampun panggih
kang pêngantyan |

--- 258 ---

tan winarna panggihira sang lir ratih | atut apalakrama ||

55. tan winarna lamine nênggani | kangjêng sunan mring ari sang rêtna |
sêmana sunan karsane | pan arsa yasa dhuwung | ingkang rayi dipun
timbang | marang ing kapandhean | Ki Supa wus rawuh | wus munggèng
ngarsa jêng sunan | Sèh Mêlaya ngandika marang kang rayi | jêbèng
ingsun karyakna ||

56. kêris cothèn sun anggo pribadi | iki wêsi saka ing kadiyat | mung
sakêmiri gêdhene | wêsi tinampan sampun | mring Ki Supa awrat
nglangkungi | nuli matur Ki Supa | pintên wêwahipun | dene kêdhik tosan
tuwan | botên kenging dipun supit munggèng api | tan kenging pinukula ||

57. angandika Kangjêng Sunan Kali | ngarah apa aja kongsi wêwah |
môngsa sagunung gêdhene | wêsi wêwah gêngipun | anjênggunuk
saengga wukir | kagèt Supa tumingal | kang wêsi sagunung | matur atur
pêjah gêsang | èwêt malih tosan tan kenging sinupit | wêwah agêng
sacala ||

58. kangjêng sunan angandika aris | ya sagunung wêsi ingkang ilang |
mung sakêmiri kang maksèh | sirna wêsi sagunung | ingkang maksih
mung sakêmiri | saking mandining sabda | Ki Supa jrih ngungun | ingkang
wêsi gya cinandhak |

--- 259 ---

dèn nyêt-ênêt datan dangu dadi kêris | warna bang lir sangkêlat ||

59. kangjêng sunan langkung sukèng galih | amriksani marang ipenira |
dene nyubaki karsane | dhuwung nuli pinundhut | sampun katur marang
sang yogi | jêng sunan malih nabda | apa dhapuripun | Ki Supa umatur
nêmbah | môngsa borong anggèn paduka mastani | kawula nut ing tuwan
||

60. kangjêng sunan ngandika mastani | sun arani kris dhapur sangkêlat |
dene kris abang warnane | nanging iki tan patut | inggun anggo wong laku
santri | iki pantês kagêma | mring patingginipun | nêgara ing tanah Jawa |
wus pinasthi benjang dadi pusaka ji | kang mêngku tanah Jawa ||

61. lah pundhinên jêbèng dèn arêmpit | bokmênawa benjang darbe darah
| amêngku nungsa Jawane | dhuwung tinampan gupuh | mring Ki Supa
dhuwung pinundhi | nabda malih jêng sunan | ya gawèkna inggun | cothèn
pranti pambêlahan | ingkang patut dèn anggo wong laku santri | mêngko
sun grèsèk tosan ||

62. kangjêng sunan nuli nyipta wêsi | mêtal saking mêtatabating wahdat |
amung saklungsu gêdhene | pinaringakên sampun | mring Ki Supa sigra
kinardi | pinijêt kaping tiga | nuli dadi [da...]

--- 260 ---

[...di] dhuwung | anulya katur jêng sunan | kalêrêsan ingaran crubuk kang
kêris | kasmaran kangjêng sunan ||

7. Asmaradana

1. ri sêmana Sunan Kali | pamit marang ibu rama | wangsul mring Dêmak
karsane | Ki Supa apan tinilar | kinên tut palakrama | gya lumampah sang
awiku | Iman Sêmantri tut wuntat ||

2. tan winarna kang lumaris | kawarnaa Kyai Supa | kang pasihan lan
garwane | Ki Supa pamit mring garwa | arsa mring Majalêngka | atêtuwi
rama ibu | Ki Tumênggung Supadriya ||

3. kang garwa tan kêna kèri | arsa priksa maratuwa | gya pamit rama
ibune | têtuwî mring Majalêngka | sang rêtna wus karilan | pinaring
pawongan agung | jalu èstri wolung dasa ||

4. sigra budhal sang aputri | nitih joli jinajaran | upacaranira abyor | Ki
Supa nitih turôngga | rêspati payung abang | kang ningali brôngta wuyung
| Ki Supa bagus taruna ||

5. kunêng wau kang lumaris | ya ta gênti kawarnaa | nagri Dêmak
winiraos | Sang Dipati Natapraja | wus saos wrêksanira | badhe karya
masjid agung | pra wali pêpak sadaya ||

6. Kangjêng Sunan Giri prapti | anggawa saka sêkawan | tanapi Jêng
Sunan Ngampèl | ambêkta saka sêkawan | miwah [mi...]

--- 261 ---

[...wah] Jêng Sunan Benang | lawan Kangjêng Sunan Kudus | tuwin Sunan
Purwagônâ ||

7. Pangeran Palembang prapti | angampil saka sêkawan | kayune jati
trêmbalo | Sunan Wukirjati prapta | gawa saka sêkawan | Kangjêng Sunan
Kali rawuh | lan Pangeran Sitijênar ||

8. jangkêp wolu para wali | sanga Pangran Sitijênar | mukmin dadi
pênganjure | ngladosi saka nyêkawan | Jêng Sunan Kalijaga | ngladosi
saka mung têlu | canthoka kang sami bêkta ||

9. la dene kurang sawiji | dèrèng angsal angupaya | para mukmin prapta
kabèh | anggawaa kang sêsaka | bubuhane nyêkawan | sêdaya sami
pinatut | pinasah lawan rêmpêlas ||

10. kumrubut wran nambut kardi | ngundhagèni kang sêsaka | pinetang
gunging sakane | agêng alit wolung dasa | nanging kirang sajuga | Jêng
Sèh Maolana muwus | mring Jêng Sunan Kalijaga ||

11. lah ta jêbèng Sunan Kali | aja sira ngeca-eca | besuk esuk ing adêge |
sakaguru maksih kurang | kang kèthèr kaki sira | Jêng Sunan Kali umatur |
gih mangke dalu ngupaya ||

12. ya ta Kangjêng Sunan Kali | kasusu karya sêsaka | angadhêpi mring
wong mêthèl | ing dalu nglêmbur

--- 262 ---

sadaya | nglumpukkên sagung tatal | tinumpuk tinata mujur | sinêbda dadi
sêsaka ||

13. anuli dipun tatahi | ingawag lawan dêduga | pangêrête wus pinêthèl |
duk lèrèn dènnya mamêrang | jêng sunan sèlèh gaman | nuju orong-orong
mêtu | katindhihan ing gêgaman ||

14. githoke pothol sasisih | orong-orong kalintingan | sêsambat pothol
gulune | munggèng ngarsane jêng sunan | sambate lir gurantang | adhuh-
adhuh gustiningsun | kawula nuwun usada ||

15. akêbat pêthèl dèn ambil | dhumatêng wau jêng sunan | orong-orong
matur alon | kula gusti botên dosa | lamun pinêjahana | jêng sunan
ngandika arum | tan nêdya matèni sira ||

16. asèlèh gêgaman mami | tan wêruh yèn sira mêdal | mêngko sira
orong-orong | sêsambat atakon dosa | dosanira kainan | tan wêruh ing
cilikipun | ngadhêpi janma mamêrang ||

17. orong-orong matur aris | tan nêdya pabên kawula | mung nyuwun
tulung wak ingong | jêng gusti ingkang sinihan | marang Kang Murbèng
Gêsang | yèn gusti tan arsa tulung | luhung nuntên untapêna ||

18. jêng sunan wêlas ningali |

--- 263 ---

kang orong-orong cinandhak | nuli sinambung gulune | tatal jati kang
kinarya | nêng githok prênahira | sêmana waluya sampun | orong-orong
githok tatal ||

19. wus pulih lir wingi uni | inguculkên sangking asta | wus mulya kadi
waune | kawarnaa sampun enjang | sagung para oliya | sami ngatag
angkat junjung | gumuruh wong nambut karya ||

20. lir sêmut solahing janmi | anggili tanpa wilangan | angusung lêmah
wêdhine | miwah wong kalang mêrgôngsa | polahe lir rewônda | Pôncawati
sêdhêngipun | mring Nglêngka nambak samodra ||

21. ing Bintara sang dipati | lir pendah Bathara Rama | jênêngi karya
tambake | para wali sami donga | nênuwun mring Hyang Suksma | yayah
dewa swarga tumrun | ngèstuti waluyèng karya ||

22. sakaguru wus rinakit | lor kulon Prabu Satmata | kidul kulon Sunan
Ngampèl | kidul wetan Sèh Molana | lor wetan Sèh Mêlaya | saka tatal
kang rumuhun | cinêblèk ngadêg priyôngga ||

23. kang tiga sami nimbangi | mêdalakên kaprawiran | sami ngadêg
sêsakane | nging ngadêg mawi lantaran | samya tinuntun asta | nuli
pamidhanganipun |

--- 264 ---

dèn oyog manjing sêsaka ||

24. saka rawa anututi | anurut saka sêkawan | sigra minggah pangêrête |
gya manjing purusing saka | dhadha pêksi andiya | wus ngadêg dudur
umagut | sadaya wus kinancangan ||

25. takir lumungsir prit gantil | wus pinasang kinancangan | datan antara
usuke | lawan rèng wus pinakonan | mastaka gya pinasang | ngadêg
sasêngkalanipun | lawang trus gunaning janma ||[19]

26. sigra sagung para wali | amawas lîrêsing keblat | nanging pradongdi
karsane | ana kang ngoyog mangetan | sawênèh nora rêmbag | masjid
dèn oyog mangidul | darêdah pirêmbagira ||

27. kèndêl ingkang nambut kardi | dene ingkang pra oliya | sami sulaya
rêmbage | tan sagêd rujuk karsanya | kang majêng lîrês Mèkah | gèsèh-
gèsèh wawasipun | keblating masjid punika ||

28. kongsi manêngah Hyang Rawi | tan ana wêkasanira | sigra Sèh Mèlaya
age | jumênêng ngidul adhêpnya | kang asta kiwa nyandhak | ing mastaka
masjidipun | astane têngên anyandhak ||

29. mastakaning Mèkah masjid | wus gathuk kala sêmana | sinamya
nênggih keblate | Sèh Mèlaya sru manabda | lah para kônca nêdha |

--- 265 ---

mawas saking keblatipun | inggih masjid ing Bintara ||

30. ing mangke wus ingsun sami | lan keblating masjid Mèkah | wali
samya gawot[20] tyase | duk dulu marang Sèh Mlaya | jrih ngungun
jroning nala | sadaya sumaur sampun | lîrês kang masjid keblatnya ||

31. wus inguculakên nuli | sampun kondur masjid Mèkah | sanalika wus
tan katon | kang katingal masjid Dêmak | sêksana ingunggahan | tinrapan
usuk rèngipun | gya pinasang sirapira ||

32. saka pênanggap pra tuwin | kang ponang sêsaka rawa | pan sampun
rinakit kabèh | pênanggap pinayu wrata | pangêrêt tumpang tiga | têngah
pangimananipun | miwah kiwa têngênira ||

33. ginatra pangimannèki | nênêm pitu pangimbaran | rêspati ing jro
masjide | dinadak kinarya Jumngah | kang ngimani Jêng Sunan | Benang
dene kutbahipun | nênggih Jêng Sunan ing Arga ||

34. musiral Jêng Sunan Kali | ingkang adan Sunan Wurya | kêlawan Sunan
Ngudunge | ing Crêbon lawan Palembang | gih sami tumut adan | pra wali
lan mukmin sagung | malbèng ing masjid asalat ||

35. tanapi sabat lan murid | awor dènira asalat | lumêbu marang masjide |
pira-pira janma salat | sampun [sampu...]

--- 266 ---

[...n] klêbu sadaya | saking jêmbar agêngipun | wau masjid ing Bintara ||

36. lan barkahing para wali | sabakdanira asalat | mukmin sami bubar
mulèh | lan sagunging murid sabat | sampun bubar sadaya | para wali
maksih kantun | prasamya apêpujian ||

37. pêpujian sarwi dhikir | kongsi wuru dhikirira | tan wangwang jiwa
ragane | kang dhinikir wus waspada | jumbuh Gusti kawula | sangking
wuru dhikiripun | lir pendah yuda kanaka ||

8. Pangkur

1. sêmana para oliya | para wali glis samya liru dhiri | pama sêgara lan
alun | tan adoh pinangkanya | tinarima sami ing surasanipun | tan ana
rasa-rumôngsa | rasaning kawula gusti ||

2. luwar saking jati purba | para wali Jêng Benang sigra angling | uluk
salam wuwusipun | nuli maca kudangan | kudangane jêng gusti andika
rasul | apan sarwi asung salam | sagung ingkang para wali ||

3. sawusnya sami salaman | para wali lênggah tumêngèng nginggil |
anulya sami andulu | dangu-dangu katingal | pangimanan anênggih ana
gumandhul | buntêlan lulanging menda | opyak sagung para wali ||

4. Jêng Sunan Benang ngandika | kang gumandhul bêcike dipun uthik |

--- 267 ---

para wali sami rêmbug | anuli Sunan Benang | ngambil tungkat anguthik
ingkang gumandhul | wus kêna sigra cinandhak | lulanging menda rêspati
||

5. buntêlan nuli binuka | jroning lulang ana isine malih | sumêlip di
warnanipun | kotang kêlawan surat | gya binuka kang sêrat ijêmanipun |
surat saha nabiyoulah | mustapa ingkang sinêlir ||

6. panutan panatagama | ngalam donya ing akir kang sinêlir | mring Gusti
Allah Kang Agung | dhumawuh Sèh Mêlaya | sahing salam ing sun ganjar
sira iku | rasukan lorodan ingwang | agêmên ing donya ngakir ||

7. arane ôntakusuma | ron kastuba lorodan saking swargi | iya sira
gêntèn ing sun | gadhuh ôntakusuma | lan ulêsing lulang domba sing
swarga gung | iya gawênên rasukan | agung sawabe ing wuri ||

8. dadi jimating nagara | yèn dèn anggo bawa lêksana sêkti | lah iya
turun-tumurun | titi tamat kang surat | Kangjêng Sunan Benang angandika
arum | lah ta jêbêng Kalijaga | sira ginanjar jêng nabi ||

9. lah nuli sira agêma | sun arsa wruh warnanira sayêkti | sadaya
tinaman sampun | mring Sunan Kalijaga | kang rasukan anulya ingagêm
[ing...]

--- 268 ---

[...agêm] gupuh | warnane kênyar kumilat | mangilat thathit angalih ||

10. Jêng Sunan Benang ngandika | nênggih marang sagunging para wali |
lir punapa warninipun | Kya Ki Ôntakusuma | kang tinakon pra wali samya
sumaur | sanès-sanès pandulunya | tan kenging dipun arani ||

11. Sunan Benang malih nabda | mring kang rayi lah jêbêng Sunan Kali |
ingsun bae yayi mujur | ulês lulanging domba | sun karyane rasukan
kotang anurun | mring Kyai Ôntakusuma | dene ing sun kang ngimani ||

12. kang rayi matur sumôngga | dèn aturkên carma nuli kinardi |
Ôntakusuma tinurun | tan dangu nuli dadya | dèn arani Kyai Gondhil
naminipun | mupakat wali sadaya | kang sami tumut dondomi ||

13. sêmana nuli cinoba | marang Sunan Benang ingkang akardi | nanging
sangêt sêsakipun | angamplik datan cêkap | Kangjêng Sunan Benang lêpat
dènnya ngukur | tan ngukur sariranira | kang dèn ukur kangjêng kyai ||

14. Kangjêng Sunan Giri nêdha | nyoba marang rasukan Kyai Gondhil |
sêmana ingagêm sampun | ananging datan cêkap | kang rasukan tinêdha
mring Sunan Ngudung | ingagêm inggih tan cêkap | sêdaya gung para
wali ||

15. agêng alit sami nyoba |

--- 269 ---

mring rasukan kotang Kiyai Gondhil | datan ana ingkang cukup | ana logro
lan sêsak | mung jêng Sunan Kalijaga ingkang cukup | datan lobok botên
sêsak | lir ingukur Kyai Gondhil ||

16. Sunan Benang angandika | wus pinasthi sinihan mring Hyang Widhi |
Ki Jêbêng Kali pinunjul | mring samining oliya | pratandhane tan owah
ganjaranipun | pinasthi ing tanah Jawa | jêbêng Kali kang ngimani ||

17. sêmana sampun bubaran | para wali kunêng gènti winarni | Sri
Narendra Majalangu | Sang Prabu Brawijaya | nêng jro pura langkung
putêg ing tyasipun | dene nagri Majalêngka | ing mangke pinarak gêring ||

18. akèh wong mati kêdadak | enjing sakit sore tumêkèng pati | lara sore
esuk lampus | marga luntak ludira | angising rah atanapi nguyuh marus |
saking kathahing papêjah | ing pura kandhêg kang kêmit ||

19. jro pura kathah tyang pèjah | garwa nata jêng Ratu Dwawarati[21] |
grah sangêt saliranipun | wus lami antaranya | saking sangêt dènnya
gêrah supe waktu | tan ana dhukun mulyakna | lumintu usada prapti ||

20. langkung susah sri narendra | lamun dalu sang nata èsmu ajrih |
sabên wong saos [sao...]

--- 270 ---

[...s] kêdhatun | ngandikan marang pura | kinèn mëlèk nèng daganing
kangjêng ratu | ingkang kêmit jro kêdhatyan | lurah êmpu lawan ngampil
||

21. majêng kalih gêgiliran | lurah êmpu kêlawan lurah ngampil | marêngi
giliranipun | Tumênggung Supadriya | lan kang raka Supagati ki
tumênggung | marêngi gêrah kalihnya | kadwi datan sagêd kêmit ||

22. kèwêdan ing manahira | saking sangêt karsanira sang aji | yèn sakit
kang darbe laku | asaos marang pura | apan kinèn sêsulih mring
putranipun | Supagati Supadriya | sêmana sulih kang siwi ||

23. Supagati putranira | sinulihkên Ki Jigja ingkang nami | Supadriya ki
tumênggung | asulih putranira | Jaka Supa amarêngi lagi rawuh | lan kang
garwa putri Tuban | pêngantèn enggal sang pêkik ||

24. nuju tuwi mring kang rama | ingkang rama kaparêng lagya sakit | Ki
Supa kinèn malêbu | lan kang raka Ki Jigja | inggih kadang nak sadulur
prênahipun | kêkalih sami prawira | pêngantyan enggal prasami ||

25. sampun prapta jro kêdhatyan | Supa Jigja ngandika marang puri | sang
kadwi wus munggèng ngayun | nèng dagan pêsarean | sri narendra
ngandika dhumatêng êmpu | êmpu sulih apa

--- 271 ---

sira | iya bisa tulung jampi ||

26. Ki Jigja umatur nêmbah | dhuh pukulun tan asring karya jampi | malih
ngandika sang prabu | kang bêtah mëlèk padha | ingsun sayah wus lawas
tan antuk turu | samêngko sun arsa nendra | mung sira ja na aguling ||

27. kadwi umatur sandika | ingkang wêngi anggagap[22] bangun enjing |
sirêp sajroning kêdhatun | sang nata sampun nendra | Supa Jigja maksih
lungguh ting kêranthuk | nèng daganing sri narendra | ngêlèki dyah
pramèswari ||

28. lurah juru pêsarean | sampun nendra kêlawan lurah ngampil | Supa
sayah dènnya lungguh | anuli sêsarean | andhêkukul anèng batur
kalihipun | kalajêng turu Ki Jigja | tyang dalêm sadaya guling ||

29. warnanên dhuwung pusaka | pundhèn dalêm munggèng ulon nêrpati |
nama Kyai Condhongcampur | pusaka paring dewa | sabên dalu mahya
saking wadhahipun | karsanira amêmôngsa | dêlajad gèmpur kang nagri ||

30. dilalah karsaning Suksma | pundhèn nata ruhara néluh janmi |
pratôndha badhe linarut | karaton Majalêngka | Condhongcampur sampun
wikan mêngsahipun | ingkang nama Ki Sangkêlat | bakal pusaka narpati ||

31. dèn angge marang

--- 272 ---

Ki Supa | Kyai Condhongcampur panas kang galih | arsa ngayoni gya mêtu
| saking pêthi kancana | têluh braja cumalorot kadya antu | Kyai Sangkêlat
duk mriksa | sigra mêdal anututi ||

32. wus mahya saking warôngka | Ki Sangkêlat amapak saking ngarsi |
wus panggih Ki Condhongcampur | aris ing aturira | dhuh kiyai sampun
makatên ing kayun | dene karsa ngrisak wadya | tan sae ingkang
pinanggih ||

33. Ki Condhongcampur sru mojar | kumalungkung Sangkêlat mêmalingi |
môngsa sun ajrih sirèku | gumaib kumawawa | kumawani ngundurakên
karsaningsun | sira pakaryaning janma | Ki Sangkêlat matur malih ||

34. ywa mangkana karsa tuwan | tinutugkên anêluh tiyang alit |
bramantya Ki Condhongcampur | sigra dènnya nêrajang | ngering nganan
asru ing panautipun | sru panggah Kyai Sangkêlat | datan sumêdya
ngunduri ||

35. warnanên dhuwung Ki Jigja | sarêng wikan sigra dènira mijil | saking
wrôngka arsa tulung | wus prapta prênahira | nuli panggih saking kering

kanan nuduk | Kyai Condhongcampur panggah | sarema datan gumingsir
||

36. wanti-wanti panuduknya | saking lambung gènira anuduki | gya
winalês lambungipun |

--- 273 ---

tan pasah kêragangan | kuwalahan lambung dêngkèng sigra mundur |
mung Kyai Sangkêlat panggah | arame masilih ungkih ||

37. kalimput dènira yuda | Kyai Condhongcampur kasor ing jurit | wus
pinancas grananipun | remane kacang pagas | têluh braja kocar-kacir
mawut mawur | ujure kang sampun pana | dadi gabag lan palênthing ||

38. Ki Condhongcampur lumajar | malbèng pêthi kancana datan ririh |
kêsandhung swara gumrupyuk | mundur Kyai Sangkêlat | nata kagyat
miyarsa swara gumrupyuk | ing ulonira anendra | dèn ungak tan ana
rêmpit ||

39. sang nata mangulap-ulap | kanan kering ing ngandhap miwah nginggil
| datan ana kang kadulu | parêkan eca nendra | sirêp jêjêp tan ana janma
kang watuk | mung Ki Supa datan nendra | dhêkukul pi-api guling ||

40. kawarnaa ingkang gêrah | garwa nata Ratu ing Dwarawati | kraos
ènthèng sliranipun | wungu unggyannta nendra | wahing dhèhèm sang
nata ngandika gupuh | dene wungu sira nimas | paran raosing kang sakit
||

41. kang garwa ririh aturnya | rasi asrêp raosing punang sakit | angandika
kangjêng ratu | wong turu dha tangia | kang nêng jrambah padha
gugahana [gu...]

--- 274 ---

[...gahana] gupuh | pawongan tangi sêdaya | wrêdha mudha marêk sami
||

9. Sinom

1. ya ta sampun byar raina | Supa Jigja samya mijil | saking dalêm
prabayagsa | tinarima mring sang aji | dene nuju marêngi | mulya gêrahe
jêng ratu | saking lèk Supa Jigja | kêkalih ginanjar sami | arta sinjang
sabuk kulambi lan dhêsthar ||

2. sêmana Ki Supa Jigja | tumênggungan sampun prapti | Ki Supa lawan Ki
Jigja | alênggah tiyang kêkalih | Ki Supa bisik-bisik | atutur solahing dalu |
kalane kang curiga | purun pusakèng narpati | Kyai Jigja nuli ngunus kang
curiga ||

3. Ki Jigja kagyat tumingal | dene dêngkèng ingkang kêris | gowang wuri
lêlandhêpnya | têmpak pucuking kang kêris | gawok Jigja ningali |
kêlangkung dènnya gagêtun | dene dalu tan wikan | dhuwunge kêkalih
jurit | sami dhuwung lan pusakaning narendra ||

4. Ki Supa narik curiga | Ki Sangkêlat dèn tingali | maksih wêtah datan
owah | mung balur kadi kinikir | gya sinarungkên malih | Kyai Jigja
dhuwungipun | sabuk intên dhapurnya | kang gowang dèn urut malih |
langkung bagus nging alit tangguhe Jigja ||

5. Ki Jigja aris ngandika | dhuwungira [dhuwungi...]

--- 275 ---

[...ra] yayi bêcik | age sira umpêtêna | yèn kapriksa mring sang aji |
mundhak sira bilai | aja wêwarta riningsun | marang ing liyaning wran |
nadyan ingsun ora bribin | mangke ingsun pangling warnane kris ingwang
||

6. Ki Supa aris aturnya | yèn makatên kula mulih | dhumatêng nêgari
Tuban | Ki Jigja langkung marêngi | rampung gunêmnnya kalih | Supa pamit
rama ibu | Tumênggung Supadriya | wus waluya dènnya sakit | putranira
rinilan pinaring brana ||

7. Rasawulan nuli nêmbah | mring maratuwanya kalih | pinaring bêrana
kathah | langkung nuwun sang lir Ratih | sêmana bubar nuli | wong Tuban
tan ana kantun | wahana joli sang dyah | jajaranira mêrapit | busana bra
lir pendah putri Ngurawan ||

8. Ki Supa anitih kuda | samarga-marga sêsirig | eram kang sami tumingal
| warnane Ki Supa sigit | putrine ayu luwih | nêng joli wingit dinulu |
tangèh rêngganing marga | wus lêpas dènya lumaris | tan winarna ing
marga wus praptèng wisma ||

9. sarawuhira ing Tuban | Ki Supa kêlangkung mukti | pan sangêt pinutra-
putra | marang Sang Dipati Tubin | Ki Supa dhasar alim | amandhita
ambêkipun | kathah tyang puruita |

--- 276 ---

anggêguru ngèlmu supi | myang pangiwa kadigdayan kanuran ||[23]

10. lan prabawaning curiga | Ki Sangkêlat langkung bécik | Ki Supa
kajanapriya | êmpu prawira sinêkti | manjing mukmin kas adi | Sunan Kali
gurunipun | kèringan kautaman | aguna sarana sêkti | agal alus Ki Supa
datan kèwêdan ||

11. kunêng gènti kawarnaa | Sri Narendra Majapait | marêngi dina utama |
sagung pundhèn dèn kutugi | ambuka pèthi rukmi | ngambil Kyai
Condhongcampur | tinarik saking wrôngka | sang nata kagèt ningali |
Condhongcampur pugut kêmbang kacangira ||

12. tugêl saluk pucukira | pamor kadi dèn cukili | sang nata duka ing driya
| tumbuh kang dipun dukani | langkung lingsêm kang galih | mangkana
osiking kalbu | apa kalêbon dhustha | mrih wirang ing sun nêng puri | baya
ingsun pinrih mijil saking pura ||

13. lamun ing sun turutana | sêmunè ki maling sêkti | sun mêtua saking
pura | nêng ngèndi gon ing sun panggih | datan sêmayan mami | lawan
mungsu ing sun pandung | dadi wau sang nata | mupus karsaning dewadi
| lamun tiwas pèpundhèn pusakaning rat ||

14. sêmana sang nata arsa | amangun pundhèn narpati | nimbali rêkyana

--- 277 ---

patya | kêlawan Ki Supagati | Supadriya tanapi | Japanjigja munggèng
ngayun | kalima sami ngrêpa | kinèn majêng awotsari | sri narendra
ngandika mring kyana patya ||

15. hèn Patih Gajah Pramada | ingsun arsa mangun kêris | sun gawe kêris
pusaka | Condhongcampur ingsun bêsmi | ingsun akarya malih | patih
sandika turipun | inggih sakarsa nata | kawula dhatêng lumiring | sri
narendra sgra têdhak mring pungkuran ||

16. wus prapta ing prênahira | êmpu catur munggèng ngarsi | pinêpak
sêsajinira | bêsalèn pungkuran inggih | Condhongcampur tumuli | tinarik
marang sang prabu | ki patih kinèn mola | gêng panjange nuli dadi |
Condhongcampur pinaringkên Supadriya ||

17. Ki Condhongcampur tinampan | ri sêmana dipun bêsmi | langkung
gênge kang dahana | kang wêsi sgra sinupit | dèn ambil saking api |
tinumpangkên paron sampun | Supadriya angangkat | pukule arsa ginitik |
Condhongcampur sirna mumbul mring ngawiyat ||

18. anggêrêng suwaranira | gumludhug anèng wiyati | awor lawan têluh
braja | kang sirna kala ing wengi | anunggil dadi siji | lan lintang dadi
kumukus | langkung gêng kukusira | kumutug [ku...]

--- 278 ---

[...mutug] nèng langit putih | ingkang wengi nuju padhang lir raina ||

19. kathah kang sami tumingal | umbule kang ponang agni | pan awor
kêlawan lintang | kumukus lintang ing langit | katur marang sang aji | sri
narendra nulya dulu | dhumatêng pêlataran | aningali lintang gêring | tan
antara kang lintang nuli nyuwara ||

20. lah Sang Nata Brawijaya | poma sira ngati-ati | sira pitênah
maringwang | ingsun darma anglakoni | dadi pratôndha mangkin | bakal

rusaking kêratun | lah mara tutugêna | karyaa dhuwung kang bêcik |
ingkang aran kêris siji dhapur sasra ||

21. karya tumbaling nagara | lamun tan karya sang aji | kris juga kang
dhapur sasra | yêkti rusak Majapait | mung iku wêkas mami | ingkang
lintang mari muwus | sang nata lajêng lênggah | patih êmpu munggèng
ngarsi | sri narendra aris ngandika têtanya ||

22. patih sira wus uninga | kêris sèwu dhapur siji | yèn wus uning sun
karyakna | ki patih matur ngabêkti | amba dèrèng udani | mirêng sawêg
sabda prabu | sang nata malih nabda | kêrigên wong pandhe wêsi | konên
karya kêris siji dhapur sasra ||

23. Ki Supa matur sandika | manêmbah anuli mijil | Supagati Supadriya |
Japanjigja datan kari |

--- 279 ---

sêdaya anèng wuri | pêpungkuran prênahipun | lawan lurah kêmasan |
anêrasah ingkang kêris | lawan mranggi akarya wrôngka curiga ||

24. kunêng gènti kawarnaa | Blambangan Sang Adipati | apan nuju
lêlênggahan | lawan guru nujum Tingkir | matur Ki Nujum Tingkir | sang
dipati ulun wêruh | gingsiring kraton Jawa | jangjine kurang sawarsi |
risakipun nêgari ing Majalêngka ||

25. pulungipun sampun kesah | margi saking pusaka ji | dhuwung
pundhènè sang nata | Condhongcampur ing sêmangkin | wus sirna
dhatêng langit | awor lan lintang kumukus | pusaka ngalih Tuban |
dhuwung pêpujaning wali | langkung pelag kang nama Kyai Sangkêlat ||

26. sintên wong agung kanggenan | mring dhuwung pujaning wali |
ingkang aran Ki Sangkêlat | mêsthi angrèh tanah Jawi | dadi ratu linuwih |
kinajrihan samèng ratu | ing mangke sampun nyata | nagri Tuban wus
kêtawis | kanan kering sami ngawula mring Tuban ||

27. Sang Dipati Bêlambangan | graita mêngku rat Jawi | sêmana sigra
utusan | andhustha marang ing Tubin | nênggih maling Caluring | sêktine

kalangkung-langkung | Caluring wusnya dandan | pangkat lampahnya lir
thathit | sampun prapta ing Tuban jujug ing wisma ||

28. tan [ta...]

--- 280 ---

[...n] ana janma uninga | jro dalêm ingosak-asik | amatêg aji panggandan |
prêbawa katon kapinrih | kêlawan bisa mijil | kang pinrih saking gènipun |
jinurung ing Hyang Suksma | Ki Sangkêlat nuli mijil | saking pêthi marani
gyaning duratma ||

29. Kyai Sangkêlat cinandhak | dening ki maling Caluring | sigra ginawa
umahya | sêmana laju lumaris | ing marga tan winarni | Bêlambangan
sampun rawuh | Ki Cluring trus sumewa | ing ngarsaning sang dipati | atur
sêmbah sarwi ngaturkên curiga ||

30. sêmana sampun tinampan | dhuwung marang sang dipati |
kêlangkung sukèng wardaya | sang dipati ngandika ris | ingsun tarima
yayi | karyanira kang satuhu | lan malih karsaningwang | sirèku sun
junjung linggih | dadi patih nguyuni wong Bêlambangan ||

31. wus jumênêng patihira | pra tuwinunggawa mantri | ngèstrèni sabda
dipatya | sêdaya sampun wêradin | sami atumut asih | wit dene
kasêktènipun | miwah sang adipatya | kunêng gènti kang winarni |
kaucapa Jêng Sinuwun Kalijaga ||

32. ingkang lagya midêr jagat | tan samar mring agal alit | wus priksa yèn
arinira | pêpundhène kêna maling | kang rayi tan udani | nuli mampir sang
awiku |

--- 281 ---

marang nêgara Tuban | sakêdhap anuli prapti | tanpa sangkan sigra
panggih lan Ki Supa ||

33. Ki Supa gupuh manêmbah | angaras pada sang yogi | sang tapa
lênggah ing langgar | Kyai Supa munggèng ngarsi | sang wiku ngandika ris

| jêbèng ingsun arsa wêruh | dadine Ki Sangkêlat | Ki Supa nêmbah nulya
glis | ngambil dhuwung mring pêthi akudhandhangan ||

10. Dhandhanggula

1. Kyai Supa kumêpyur kang galih | rawatane ing pêthi tan ana | dene tan
owah kuncine | sêmana tanya gupuh | ya ta marang wau kang rayi | kang
rayi datan wikan | gènnya rawat dhuwung | anuli marêg jêng sunan |
gupuh-gupuh Rasawulan angabêkti | mring raka kangjêng sunan ||

2. tinarima sang rêtna alinggih | munggèng ngarsa jajar lan kang raka |
jêng sunan aris sabdane | lah êndi ingkang dhuwung | Kyai Supa matur
ngabêkti | kawula nuwun duka | dhuwung dèrèng pangguh | ing pêthi
suwêng kewala | ri paduka datan rumaos angêlih | gènipun Ki Sangkêlat ||

3. kangjêng sunan angandika aris | marang rayi Dèwi Rasawulan |
babêthaka ariningong | lêmbaran sêga wuduk | Rasawulan nêmbah nulya
glis | mundur arsa bêtêthak | sêmune kasusu | nyêpêng kuthuke kang
putra |

--- 282 ---

tan pêpoyan putranira maksih guling | cumucut wayahira ||

4. sang pandhita ngandika bêbisik | mring Ki Supa ingsun asung wikan |
marang sira satêmêne | sira pan ora wêruh | dhuwungira ginawa maling |
Caluring raning dhustha | sêktine kêlangkung | dinuta marang dipatya |
Bêlambangan kang nêdya mêngku rat Jawi | ngupaya sarating rat ||

5. pan wus wêruh ingêring nagari | yèn wus ngalih pulunging narendra |
nèng Tuban palerenane | lah jêbèng jatènipun | dhuwungira lamun tan
mulih | mêtthi kabèh rat Jawa | Blambangan kang mêngku | yèn sira bisa
miguna | ulatana margane sangkêlat panggih | amrih tilas ing wuntat ||

6. tur sandika Ki Supa ngabêkti | inggih darmi kawula lumaksa | ngulati
pusaka rajèng | amung nyuwun pangèstu | mugi-mugi nuntêna panggih |
kangjêng sunan ngandika | ya pangèstuningsun | sêlamêta lakunira | aja
lawas iya nulia kêpanggih | dèn bisa laku samar ||

7. kawarnaa ingkang wungu guling | Supaputra lajêng marang blumbang |
makani ulam karsane | bawane rare tanggung | dèrèng priksa dugi
prayogi | anggêbyur ing balumbang | tan ana kang wêruh | adangu kèlêm
ing toya | nuli pêjah layon kumambang [kuma...]

--- 283 ---

[...mbang] ing wanging warih |[24] dangu datan konangan ||

8. kangjêng sunan têtanya mring rayi | lah ta jêbèng ingsun dangu
lênggah | putranira datan katon | timbalana putrèngsun | sun arsa wruh
gênge samangkin | Ki Supa matur nêmbah | tilêm dèrèng wungu | jêng
sunan malih ngandika | ya gugahên wus awan dene tan tangi | Ki Supa
nêmbah mentar ||

9. malbèng wisma arsa gugah siwi | nging tan ana nuli ingulatan | dèn
ungak marang pawone | kang putra dèrèng pangguh | lajêng marang
blumbang kêpanggih | layone ingkang putra | kumambang ing ranu | Ki
Supa datan wêwarta | sinarèhkên kèngêtan Jêng Sunan Kali | mapan
lagyarsa dhahar ||

10. sampun kongsi kadung ing panggalih | mila datan wêwarta mring
garwa | cinêgatan ing karsane | ingéntas layon sunu | sinarèkkên gènira
guling | pinindha lare gêsang | siningêban sampun | nulya panggih lan
kang garwa | ngenggalakên gènira bêthak kang rayi | mring pawon wus
sumêkta ||

11. sigra marêk ngarsane sang yogi | datan matur sinamur kewala | jêng
sunan amrih supene | nuli kang garwa rawuh | atur dhahar sampun sumaji
| sêkul wuduk lêmbaran | pêpak abênipun | lan ulam balêbêt tômbra |
wawutuhan tan ana kalong

--- 284 ---

sacuwil | mung tugêl kèpètira ||

12. nuli wijik jêng sunan abukti | kang lêmbaran kadhahar dagingnya |
tuwin pinunggêl brutune | jêng sunan nulya dangu | mring kang putra
suwe tan prapti | dene suwe putrèngwang | tan tangi aturu | Ki Supa
umatur nêmbah | sampun adat adangu gènipun tangi | sakit lamun
ginugah ||

13. kangjêng sunan nimbali pribadi | lah Supanom sira atangia | payo
dhahar lawan ingong | kang pêjah nuli wungu | lajêng mijil sigra
sumandhing | mring uwa kangjêng sunan | kang putra rinangkul | jêng
sunan aris ngandika | kulup payo adhahar kêlawan mami | lêmbaran
kuthukira ||

14. Supaputra lajêng tumut bukti | mring kang uwa mêtês lir wong tuwa |
Ki Supa runtuh êluhe | lênggahira tumungkul | kangjêng sunan sampun
udani | waspa mijil ngusapan | sang tapa amuwus | lah jêbèng apa
karannya | ngêmu waspa apa kang kêrasèng galih | Supa nêmbah tur
wêca ||

15. milanipun kawula anangis | putra tuwan wau sampun pêjah | kalêbèng
warih margine | sarèng paduka nguwh | putra tuwan gêsang sumandhing
| ngrêsahi tuwan dhahar | kraos manah ulun | jêng sunan aris ngandika |
sira iku dora asih marang mami | ngaturkên kuthuk [ku...]

--- 285 ---

[...thuk] gêsang ||

16. gya lêmbaran ingkang anèng piring | gêsang malih Supaputra
nyandhak | nging wus nir wulu brutune | pan dadi jêpun tukung |
Supaputra supe abukti | mung bopong kuthukira | rêmêne kêlangkung |
pinangku gya pinakanan | kangjêng sunan dumugèkkên dènnya bukti |
abêne ulam tômbra ||

17. langkung nikmat gènira abukti | ulam tômbra dhinahar dagingnya |
tan owah sirah êrine | tanapi jroanipun | datan owah daginge ênting | jêng
sunan angandika | apa bumbonipun | iwak tômbra luwih eca | ingkang rayi
matur bumbu urip-urip | sang tapa angandika ||

18. iya bènêr sira angarani | urip-urip urip sadayanya | kang dhahar lawan
ulame | de padha uripipun | nuli tômbra kang anèng piring | anggronjal

malih gêsang | ngandika sang wiku | sun arani règès sira | dene uwis
dagingira ênting urip | dadia tilas ingwang ||

19. ingkang tômbra anuwun turnèki | kangjêng sunan mugi tinulusna |
asih ing mina uripe | jêr saliring tumuwuh | kang gumêlar miwah kumêlip |
kasrah manungsa mulya | saking Hyang Kang Agung | jêng sunan nabda
tarima | ponang tômbra wus kinèn malêbèng warih |

--- 286 ---

kang kinèn sigra mentar ||

20. wus pinêrnah kang tômbra nèng bèji | toya wêning kang tômbra
katingal | gumawang sirah êrine | kèpèt jêroanipun | kang katingal daging
tan pulih | pan dadi patilasan | kala dhaharipun | jêng Sunan Kali nèng
Tuban | ingkang tômbra kasawaban tumut sêkti | bisa katon nyeluman ||

21. wus linorot dènira abukti | mring kang rayi tuwin para sabat | wêrata
murid santrine | ngandika sang awiku | putranira ing sun parabi | Ki Ênom
aprayoga | warnanira bagus | lah uwis sira kariya | lamun arsa ngêlutake
laku mami | arsa nganglang buwana ||

22. Rasawulan anulya ngabêkti | Kyai Supa dhèrèk mring jêng sunan | wus
mijil saking kithane | ngandika sang awiku | lah ta jêbèng mangkata nuli |
mring nagri Bêlambangan | aja tutur-tutur | marang anak rabinira | lamun
sira tutur marang anak rabi | mêsthi tan sida lunga ||

23. Kyai Supa nêmbah sigra pamit | nuli laju marang Bêlambangan |
kalilan lajêng lampahé | andum slamêt sang wiku | kur-ungkuran dènnya
lumaris | sami datanpa rowang | mangalor angidul | lampahé Supa
winarna | gêgancangan [gêgancang...]

--- 287 ---

[...an] ngupaya marga kang aglis | numpang ing êmpu dagang ||

24. ana êmpu Madura kang prapti | Kyai Singkir nênggih aranira | Ki Supa
nunut karsane | angalih aranipun | Kyai Kasa ingkang wêwangi | sami

pandhe nglautan | Kasa Singkir pêthuk | ingaku kadang taruna | Kyai Kasa
sêmana ginawa mampir | marang nagri Madura ||

25. sêlamine lumaku jêladri | Kyai Kasa pandhe ing lautan | ngrewangi
karya calone | kawan dasa pikantuk | sami angsalira Ki Singkir | padha
kuwasanira | anyingkirkên mêndhung | nyingkirkên barang prakara |
anyingkirkên sato galak wisa mandi | tawa dening Ki Kasa ||

26. awêtara antuk madyèng tèngsi | Kyai Kasa nèng nagri Madura | nuli
layar baitane | Sumênêp kang jinujuk | êmpu bisu dipun pondhoki | wêtara
madya côntra | lajêng lampahipun | prapta nêgara Koripan | milu pandhe
awêtara madya sasi | lajêng mring Bêlambangan ||

27. tan winarna laminirèng margi | Kyai Supa praptèng Bêlambangan |
ngalih Ki Pitrang arane | jujuk wismaning êmpu | Êmpu Sarap dipun
pondhoki | Pitrang kanggêp karyanya | dadi panjakipun | Ki Sarap
kêlangkung suka | wit Ki Pitrang cakêp ing saliring kardi |

--- 288 ---

mawèh rêlêsèping driya ||

28. pakaryanya Sarap nambut kardi | sabên dina marang jroning pura |
mring bêsalèn pasowane | Ki Pitrang datan kantun | apan sami anambut
kardi | karya dhuwunging nata | kathah karsanipun | kang jênêngi kyana
patya | nèng bêsalèn anyêlani gawe lading | marang Ki Êmpu Sarap ||

29. Kyai Sarap aparentah nuli | wau marang panjak Kyai Pitrang | akarya
lading tunggule | sigra kinarya sampun | tandya katur marang ki patih |
sêmana wus bubarane | sêdaya ngaso wus | ki patih duk praptèng wisma |
nulya lênggah astanira nyêpêng lading | anyar dèrèng kaasah ||

30. gènnya lênggah parêg lan kang siwi | maksih timur rumusuh wancinya
| ingugung barang karsane | angrêbat lading tunggul | lêlandhêpe
cinandhak kêni | kabêlèr astanira | niba lajêng lampus | ki patih kagyat
karuna | datan nyana kang putra tumêkèng lalis | dene bêsèr sarema ||

31. ingkang layon wus ingupakardi | apan sampun kinubur sêmana | kya
patih mangke karsane | anôndha ladingipun | wus ingasah nuli kinardi |

amêrang wong kadosan | tan jro labêtipun | tan parah laju pralena |
pinêrangkê-

--- [0] ---

[Grafik]

Kangjêng Ratu Dwarawati gêrah, Kyai Jigja lan Jakasupa sami tugur.

--- [0] ---

...

--- 289 ---

n pêthetan kayu kumuning | laju gagrag sakala ||

32. anggarjita Kya Patih Caluring | ampuh têmên lading tunggul ika | dudu
Ki Sarap kang gawe | pan amung panjakipun | mendah karya tumbak lan
kêris | pantês karya batuwah | mandine kêlangkung | bok iya sun kone
karya | panjak Sarab bokmanawa bisa kardi | kêris kêlawan tumbak ||

33. sampun enjing kyana patih nangkil | mring bêsalèn kêpanggih Ki
Sarap | sami sowan nyambut gawe | Ki Pitrang datan kantun | awor panjak
dènira linggih | kya patih angandika | Ki Pitrang tinêmbung | kinèn damêl
kêris tumbak | Kyai Sarap umatur marang kya patih | sumôngga ing
sakarsa ||

34. Ki Caluring angandika maring | Kyai Pitrang mangkana dêlingnya |
manira angalang gawe | dika gawèkna dhuwung | ingkang ampuh sami
lan lading | wingi dika akarya | lading alit tunggul | ampuhe kagila-gila |
kongsi bisa putrèngsun tumêkèng lalis | margi nyêpêng ladingnya ||

35. yèn klêrêsan antuk dika kardi | mêsthi katur marang sang dipatya |
manira kang ngaturake | Kyai Pitrang umatur | inggih darmi kawula kardi |
awon sae sumôngga | saking bodho ulun | Ki Pitrang pinaring [pi...]

--- 290 ---

[...naring] tosan | kinèn milih kang prayoga gawe kêris | wêsi gya pinilihan
||

36. ponang wêsi sêmana kinardi | nulya dadya amung sakêmbaran | tilam
upih kris dhapure | tumbak biring kang dhapur | sampun katur marang
kya patih | ki patih ngungun mulat | mula bagus têrus | Ki Pitrang tuhu
prawira | wignya pandhe arikat dhangankên galih | tan suwe dadi braja ||

37. ajrih asih Ki Patih Caluring | mring Ki Pitrang langkung mamèt manah |
Ki Pitrang pinrih krasane | sinarah karsanipun | saking datan sagêd malês
sih | pinêlêng karyanira | dènnya yasa dhuwung | kalêrêsan sinêmbadan |
sakêlangkung tarima rêkyana patih | Pitrang ingakên kadang ||

38. nuli katur marang Sang Dipati | Bêlambangan Sang Siyung Lautan |
Pitrang katur sasolahe | ngartika Siyung Laut | mring aturing Patih
Caluring | anuli tinimbangan | Ki Pitrang wus rawuh | nêng ngarsane sang
dipatya | tunggil patih Ki Pitrang gènira linggih | kang èsmu mawèh
brôngta ||

11. Asmaradana

1. angandika sang dipati | marang ingkang nêmbè prapta | lah bagea
satêkane | slawase nêng prajaningwang | nêmbah nuwun Ki Pitrang | sang
dipati malih muwus | lah Pitrang apa

--- 291 ---

kaduga ||

2. agawe kêris kang bêcik | kang kêmban lan agêm ingwang | pusakaning
jagat kene | yèn kaduga sun gawèkna | kinarya sakêmbaran | Ki Pitrang
nêmbah umatur | lamun wontên kang tinêpa ||

3. narik dhuwung angling malih | lah kapriye sira Pitrang | apa wus awas
warnane | yèn wus awas gawèkêna | sun karya sakêmbaran | Ki Pitrang
malih umatur | kawula dèrèng waspada ||

4. yèn kawula kinèn kardi | kêmbaran pundhèn paduka | pinaringna
lêpiyane | lan panggenan kang prayoga | kenginga kangge muja | kang
pêtêng panggenanipun | mrih kêtawis ingkang cahya ||

5. lan sajènipun kang suci | kajênêngana kya patya | Ki Pitrang kagêm
ature | sang dipati angandika | marang rêkyana patya | lah yayi patih sun
tuduh | anjênêngi Êmpu Pitrang ||

6. gawèkna panggonan sêpi | sarating muja bathara | kang pêtêng suci
sajène | anuli Kyai Sangkêlat | winadhahan kêndhaga | sarunganira
pinundhut | dhuwung pinaringkên ligam ||

7. wus tinampan mring ki patih | Ki Sangkêlat nêng kêndhaga | gya mijil
saking kêdhaton | lan wêsi buda kinarya | waja pamore tunggal | sami
anêng kêndhagèku | kya patih lawan Ki Pitrang ||

--- 292 ---

8. ing bêsalèn nuli prapti | nayaka wastra lan Pitrang | ginubahan
bêsalène | sininggêt mawi sênthongan | apêtêng dening gubah | kya patih
prêcayèng kalbu | marang Kyai Êmpu Pitrang ||

9. dhuwung pusakèng narpati | pinasrahkên mring Ki Pitrang | pinêrnah
sêndhong[25] bêsalèn | ki patih jawi gènira | lawan Ki Êmpu Sarap |
anyurtèni sajènipun | kutug mênyan datan pègat ||

10. sêmana pan sampun wengi | Ki Supa malbèng sênthongan | amêmuja
mring Hyang Manon | kang badhe dhuwung pinuja | katrima mring Hyang
Suksma | dadi kêkalih kang dhuwung | katêlu Kyai Sangkêlat ||

11. katri warnanira sami | tan ana gèsèh sarema | sami sangkêlat dhapure
| Ki Pitrang bakda mamuja | amatêk sirêpira | jinurung marang Hyang
Agung | kang jaga turu sêdaya ||

12. Ki Sarap lawan kya patih | kêpati unggyaning nendra | sami anglindur
angorok | Ki Supa mêtu singidan | angêmpit Ki Sangkêlat | mring narmada
kang jinug | pinêrnah sajroning toya ||

13. dinunung nêng sela nuli | sinasaban watu kambing | arêmpit kiwa
ênggone | sigra wangsul Kyai Pitrang | bêsalèn sampun prapta | malêbèng
sênthonganipun |

--- 293 ---

dhuwung kêkalih tinata ||

14. anèng ing kêndhaga adi | kawarnaa wus raina | mahya saking
sênthongane | amungu marang kya patya | patih agudandampan[26] |
ningali padhang gumuyu | ngandika têtanya warta ||

15. Ki Pitrang umatur aris | punika ingkang kêndhaga | katuripun sang
arajèng | kawula dèrèng uninga | isine kang kêndhaga | ki patih nampani
gupuh | kêndhaga sigra binuka ||

16. isine dhuwung kêkalih | pan sami dhapur sangkêlat | kêmbat tan ana
bedane | ki patih gawok tumingal | aris dènnya têtanya | ingkang pundi
polanipun | Pitrang umatur tan wikan ||

17. kawula datan udani | mêmuja turuning cahya | ing dalu tan winiraos |
kang cahya sampun tumêdhak | nênggih dhatêng kêndhaga | dèrèng
priksa warnanipun | kang dhihin lawan kang anyar ||

18. kewraning tyas kyana patih | sang kalih lumêbèng pura | sampun
cundhuk lan sang rajèng | sang kadwi wus munggèng ngarsa | angaturkên
kandhaga | sigra pinundhut mring prabu | ponang kêndhaga binuka ||

19. isinya katga kêkalih | pan sami dhapur sangkêlat | kêmbat tan ana
bedane | dipati langkung kacaryan | mangkana ris dêlingnya | Pitrang êndi
[ê...]

--- 294 ---

[...ndi] kang rumuhun | apa kering apa kanan ||

20. Ki Pitrang matur wotsari | kawula botê[27] uninga | sumôngga ing
karsa rajèng | sang dipati kewran ing tyas | nuli ngasta sarungan |
sinarungkên ingkang dhuwung | sarema tan mawi rênggang ||

21. sinarungkên gènti-gènti | tan ana ing siwahira | wrôngka siji dhuwung
karo | apan sami manjingira | sami ing warnanira | sang dipati malih
muwus | ingkang êndi pundhèn ingwang ||

22. Ki Pitrang matur tan uning | sumôngga karsa paduka | dèrèng
waspada warnane | pêpundhèn dalêm curiga | ngênglêng tyas sang
dipatya | sinawang-sawang kang dhuwung | gènti-gènti manjing wrôngka
||

23. sarema tan mawi slisir | dhuwung kêmba kamanikan | wali-wali
pandangune | sang dipati mring Ki Pitrang | tan owah aturira | sumôngga
karsa pukulun | langkung eram sang dipatya ||

24. angling malih sang piti |[28] karo pisan pundhèn ingwang | sun larangi
gawe manèh | dhuwung kang dhapur sangkêlat | ngamungna ingkang
kêmba | yèn ana ingkang kabanjur | iya nuli kalêbura ||

25. Ki Pitrang lawan kya patih | tur sandika sarwi nêmbah | ngandika
malih sang rajèng | luwih bangêt tarimèngwang | tan ana sun walêsna |
mring Ki Pitrang sêtyanipun | kongsi dèn rewangi muja ||

--- 295 ---

26. dadi kêris ingsun iki | dudu Pitrang ingkang karya | olèhe muja dewane
| pratandhane datan wikan | kang dhingin lan kang anyar | kyana patih
nêmbah matur | kasinggihan sabda tuwan ||

27. sang dipati angling malih | Ki Pitrang sun junjung lènggah | ing
Sêndhang Sêdayu mangke | arana Pangeran Sêndhang | rabia
putraningwang | Sugiyah warnane ayu | Ki Pitrang nuwun tur sêmbah ||

28. aparentah sang dipati | manggihkên kang putra kênya | kya patih dadi
besane | mangku marang Kyai Pitrang | ki patih langkung suka | dhasar
wus ngaku sadulur | dènira sih tan kêpalang ||

29. arame wong nambut kardi | ing pura lan kapatihan | wus tinabuh
gamêlane | awêtara limang dina | unine kang pradôngga | nuli pangantèn
malêbu | tinimbangan marang pura ||

30. ingiring punggawa mantri | miwah kang para bupati | abra sinang
busanane | pangantyan wus praptèng pura | lunggwèng bangsal kancana |
putranira sang aprabu | nênggih sampun binusanan ||

31. amangagêm adi luwih | tangèh rêngganing busana | tuhu yèn putri
kinaot | karênga dening busana | lir murca kinêdhèpna | musthikani[29]
sang dyah ayu | wus munggèng ngarsaning rama ||

32. Pangran Sêndhang [Sê...]

--- 296 ---

[...ndhang] dèn timbali | praptèng ngarsa atur sêmbah | sang dipati
ngandika lon | kaki Sêndhang tampanana | pratandhane sih ingwang |
putrèngsun wanodya ayu | ya dadia jatukrama ||

33. Pangran Sêndhang atur bêkti | kêlangkung nuwun kawula | pinaring
jimat pamine | sigra pinondhong sang rêtna | inginggahkên jêmpana |
parêkan ngiring sêdarum | sami ngampil upacara ||

34. sampun mijil saking puri | pangeran jajari ngarsa | pan sarwi mandhi
tumbake | sarêng praptèng pamurakan | pangran nitih turôngga |
pinayungan kartas biru | tinêlacap ing pêrada ||

35. ing wuri sang rajaputri | rêspati nitih jêmpana | amêrapit jajarane | tan
kocap rêngganing marga | wus praptèng kêpatihan | sigra têdhak sang
rêtnayu | pinanggihkên lan Ki Pitrang ||

36. pinondhong mring dalêm aglis | ya ta sampun tata lênggah | kang
ngiring pêngantèn andhèr | mijil kang ponang sunggata | sadaya sami
dhahar | wrata jawi lêbêt sampun | linorot sigra bubaran ||

37. wus samya ngaso pra ngiring | tan kawarna rêsmînira | bangun turut
kang pangantèn | sampun atut palakrama | kèh janma kang tumingal |
pêndhak dina laminipun | pêngantèn nêng kapatihan ||

--- 297 ---

38. malbèng pura mit sudarmi | arsa budhal marang Sêndhang | wus kari
lan mring sang rajèng | tanapi mring kyana patya | rinilan sigra budhal |
dhumatêng Sêndhang Sêdayu | wong Sêndhang mêthuk sadaya ||

39. lampahira wus lêstari | gumuruh samarga-marga | kang kamargan
samya nonton | wus datan kawarnêng marga | samana praptèng
Sêndhang | tumamèng ing suyasa gung | de wisma ingkang adarbya ||

40. gih Pangran Sêndhang kang swargi | kadange Nata Blambangan | seda
tan darbe warise | pramila suwung kewala | mangke karsa dipatya |
pinaringkên putra mantu | gih Pangran Sêndhang samangkya ||

41. kinèn têtêp apalinggih | tan owah parentahira | wong Sêndhang wus
suyut kabèh | sigêg Pangeran ing Sêndhang | ya ta gênti kawarna | wau ta
Ki Agêng Tarub | pan sampun pêputra priya ||

42. sajuga pêkik kang warni | sêmbada sêkti digdaya | Gêtas Pêndhawa
parabe | amung sajuga punika | Lêmbupêtêng wus lena | kang putra
gumanti sampun | ananging ngalih dhukuhnya ||

43. ing Sela kithanya mangkin | jêjuluk Ki Agêng Sela | dene ing Tarub
samine | mung kinarya patilasan | warnanên Kyagêng Sela | mangke
palakrama sampun |

--- 298 ---

antuk putri ing Sumêdhang ||

44. sudarmanira sang dèwi | asal saking nagri Cêmpa | saking Arab
nalurine | rajaputri ing Sumêdhang | kaprênah wayahira | lan Dwarawati
Jêng Ratu | garwane Sang Brawijaya ||

45. Ki Agêng Sela samangkin | kasêngsêm mring ngèlmu rasa | olah
agama sucine | pan sampun apuruita | mring Sunan Kalijaga |
pinanjingakên sadulur | lawan Dipati Bintara ||

46. sih-sinihan risang kadwi | supêkêt dènnya kêkadang | sang dipati dadi
anom | Gêtas Pêndhawa kang tuwa | kinarya tuwanggana | saliring
rêmbag tinantun | dhinahar saaturira ||

47. Ki Agêng Sela ngrêmbagi | anêlukkên Majalêngka | sang nata pinrih
Eslame | Mahaprabu Brawijaya | dèrèng manut agama | sang dipati
karsanipun | kang rama kêdah pinêksa ||

48. sêmana sang adipati | sowan marang Majalêngka | Ki Agêng Sela
rowange | dèn iring murid sabatnya | ing marga tan winarna | wus prapta
ing Majalangu | anjujug ing kapatihan ||

49. laju sowan marang puri | wus tundhuk ngarsa narendra | ya ta wau
sang arajèng | lènggah mungging bangsal rukma | kya patih lan dipatya |
wus mungging byantara prabu | ngandika sri naranata ||

--- 299 ---

12. Sinom

1. lah bagea putraningwang | anglêngkara seba mami | apa ana karsanira
| nêmbah matur sang dipati | mila sowan rama ji | yèn marêngi karsa
prabu | di dalêm Majalêngka | kawula suwun sang aji | gih sadaya samia
lampah agama ||

2. paduka mugi Eslama | prayogi akarya masjid | kadya masjid ing Bintara
| kaidenan para wali | nata ngandika aris | sasênêngan bab puniku | ora
nglarangi ingwang | kang padha gêlêm nglakoni | nanging ing sun tan arsa
agama Islam ||

3. kang putra merang jroning tyas | tan kadhahar aturnèki | kèndêl tan
mulat ing liyan | sarirane dèn tingali | sang nata wus udani | sinamun

ngandika arum | hèn patih kayaparan | sakèhing wong pandhe wêsi | apa
ana kang sanggup karya curiga ||

4. katga siji dhapur sasra | kya patih matur wotsari | di dalêm êmpu
sêdaya | sêpuh anèm agêng alit | tan wontên kang kadugi | dèrèng wikan
warninipun | sang nata èsmu duka | dhumatêng rêkyana patih | sri
ngandika lah sira dhewe mênyanga ||

5. ngupaya êmpu utama | aja age-age mulih | yèn durung ana sanggupa |
anutugi karsa mami | lah wis bubara mulih |

--- 300 ---

kêkalih sarêng wotsantun | wus mijil saking pura | sang kadwi sarêng
lumaris | kur-ungkuran kya patih lan sang dipatya ||

6. kunêng ta ingkang lumampah | warnanên malih sang aji | têdhak
marang pêpungkuran | mriksani wong nambut kardi | kêmasan lawan
mranggi | myang saguning para êmpu | pulombang Supadriya | Ki Japan
lan Supagati | Kyai Êmpu Suprana miwah Ki Jigja ||

7. Panêti lan Salaita | Bêkêljati lawan Modin | Ki Mèhi lan Wanabaya | Ki
Kuwung tuwin Ki Singkir | sagung êmpu rat Jawi | sami kinèn karya
dhuwung | kang dhapur warna-warna | nanging tan ana nyubaki |
dhuwung siji ingkang dhapur nagasasra ||

8. sri narendra pagunêman | lan dasih kang nambut kardi | hèn mranggi
ingsun têtanya | gonira anambut kardi | paran kadayannèki | antuk
bêkahirèng ratu | Ki Mranggi aturira | tan angsal bêkahing gusti | datan
bukti yèn botên tampi ganjaran ||

9. sri narendra ris ngandika | ya ingsun darma nglakoni | wus pinasthi
karsèng dewa | nrima ganjaran sathithik | tan olah[30] barkah mami | lah
ta sira bocah êmpu | sira matura wêca | unggwanta anambut kardi | apa
sira pakantuk barkah narendra ||

10. ki êmpu matur

--- 301 ---

wotsêkar | pukulun têrkadhang gusti | inggih wontên lêlangkungan |
punika barkahing gusti | yèn datan wontên ugi | mung cêkap karsa sang
prabu | nata malih têtanya | tukang mas matura yêkti | apa sira olèh
barkahing narendra ||

11. lurah kêmasan tur sêmbah | inggih angsal barkah gusti | sabên kawula
nglêbur mas | punika barkah narpati | pinasthi sabên kardi | antuk wragad
kalih tangsul | sing silipa mèt amba | sêpalih tangsul sêtail | tan kêtawis
warni lan wawrat tan owah ||

12. sênadyan katêngganana | kêlawan dipun wudani | malah dados rêna
amba | tan pakêwêt mëndhêt silip | saking prapèn lan kowi | punika ing
silip ulun | inggih arêngkang bêkta | saking bêkahing narpati | yèn
klêrêsan agêng ganjaran narendra ||

13. sang nata gumujêng suka | angandika èsmu manis | iya bènêr aturira |
salir pakaryaning dasih | iya katrima ngambil | wit saking barkahing ratu |
nadyan sira culika | saking suka dènnya ngambil | alantaran saka
bêkahing narendra ||

14. sayêkti ratu winê nang | ngingoni ing dasih kardi | ngupaya dasih
utama | marang saliring pakarti | ratu ingkang ngajèni | karyaning [kar...]

--- 302 ---

[...yaning] dasih kang èstu | tan ketang culikanya | kalingan mring karya
luwih | ganjarane ngluwihi ajining karya ||

15. yèn dasih mundhak karyanya | sang nata angganjar maning | sira
Êmpu Supadriya | kabèh pandhe tan ngarani | yèn sira bisa kardi | kêris
siji dhapur sèwu | gédhe ganjaran ingwang | pêsthi sun karya bupati | para
êmpu ngaturakên pêjah gêsang ||

16. sri narendra ris têtanya | Supadriya putranèki | kang aran Ki Jaka Supa
| dene tan ana kaèksi | tan milu nambut kardi | Supadriya nêmbah matur |
di dalêm imah-imah | tinriman putri ing Tubin | ngêlutakên pun Supa
marang rabinya ||

17. malih ngandika sang narpa | dene bêkja dèn trimani | marang ibu ratu
Tuban | yêkti mukti tan wèh mulih | Supadriya sun tuding | mentara mring
Tuban gupuh | timbalana Ki Supa | têmbungên uwa dipati | Supadriya amit
manêmbah gya mentar ||

18. sampun mijil saking pura | praptèng jawi wus kapanggih | kêlawan
wong tumênggungan | saupacara miranti | sêksana mangkat nuli | kawan
dasa rowangipun | kunêng kang marang Tuban | ya ta gênti kang winarni |
nênggih wau Sang Adipati Bintara ||

19. lawan Ki Gêtas Pêndhawa | miwah sagung

--- 303 ---

para murid | saking nagri Majalêngka | saos atur sang dipati | marang sri
narapati | tan kadhahar aturipun | langkung merang ing driya | tan nêdya
kondur mring nagri | apan laju mring Ngampèl sowan kang rama ||

20. jêng sunan pinuju lênggah | ingayap pra sabat murid | kasaru wau
praptanya | kang putra sang adipati | ngaraspadèng sang yogi | sampun
ingancaran lungguh | Kyagêng Sela ngraspada | tinarima kinèn linggih |
sang pandhita ngandika panamudana ||

21. matur nuwun sang kadwinya | wusnya ngaso sawatawis | sang dipati
matur nêmbah | dhumatêng sang maha yêkti | amba atur udani | mêngtas
marêk sang aprabu | Sinuwun Majalêngka | ing mangke amba aturi |
agamia Islam sawadyabalanya ||

22. miwah masjid ayasaa | kaidènana pra wali | kadi masjid ing Bintara |
sabdaniipun sri bupati | sasênêngan wadya lit | kang padha nut gama rasul
| nanging nata tan arsa | anglampahi gama suci | samangkyamba
sajroning tyas sangêt merang ||

23. asudarma kapir buda | lêhêng ywa ingaku siwi | nuwun pangèstu
paduka | mangke nagri Majapait | arsamba rêbat jurit | agami
bêbukanipun | yèn manuta sang nata | linoro-

--- [304] ---

[Grafik]

Gambar masjid ing Dêmak, kapirsani saking ngajêngan katingal sadaya rêrakitipun.

--- [305] ---

[Grafik]

Gambar masjid Dêmak, perangan ing nglêbêt, sakaguru kacariyos ingkang kadamêl saking tatal.

--- 306 ---

t karatonnèki | sinalinan narendra kang gama Islam ||

24. jêng sunan aris dêlingnya | gege laku sira kaki | durung môngsa ratu buda | jangjine kurang sawarsi | yèn wus praptaning jangji | sakarsanira anggêmpur | mring nagri Majalêngka | yèn ratu Islam wus tampi | nugrahane kang ginaib iya sira ||

25. lamun pulung wus tumiba | marang ratu gama suci | sirna dhewe ramanira | sri narendra wus udani | paningalira sidik | têrus ing wacanipun | ora nyêgah mring Islam | mung sang nata datan arsi | jêr wus wikan sang nata mungkasi buda ||

26. ing samêngko kaki sira | ngupayaa pusaka ji | sarat amurba masesa | saking sih-sinihan kaki | kang dhihin mring Hyang Widhi | suwunên ingkang satuhu | tagihên mring kang karya | nugraha lan pati urip | dèn nyatakna ing tingal lan pôncadriya ||

27. rina wêngi aja pêgat | panuwunmu mring Hyang Widhi | ywa uwis yèn durung tômpa | dene ingkang kaping kalih | sagung kang para wali | suwunên pandonganipun | dèn asih gurunira | turutên wulange kaki | guru iku gêntine sudarmanira ||

28. lawan malih amintaa | batuwah pusaka aji | mring ramanta Kalijaga |
kang wus [wu...]

--- 307 ---

[...s] olèh sihing Widhi | lawan mintaa maning | pangèstu ramanta iku |
Sang Dipati Palembang | langkung sih mring sira kaki | lah anggêpên
lanjaraning uripira ||

29. kang putra matur sandika | kêlangkung padhanging galih | gènira
tampi piwulang | kathah karaos ing galih | kêlangkung nuwun kang sih |
dhumatêng sang maha wiku | sêdalû pagunêman | kawarnaa sampun
enjing | sang dipati tur pamit ing sang pandhita ||

30. catur mangaras ing pada | wus lèngsèr prapta ing jawi | datan kondur
mring Bintara | laju lumampah nênpî | amêrês ing panggalih | Kyai Gêng
Sela tan kanton | lan Patih Wanasalam | kapat Sang Iman Sumantri | catur
pisan kadang tunggil gurunira ||

31. awirandhungan lampahnya | Natapraja Sang Dipati | ingiring katri
sudara | wisata jajah nagari | sagung kang para wali | pininta
pandanganipun | sadaya sampun rêmbag | ngèstuti ngrêbat nêgari | para
wali samya manjurung pandonga ||

32. kunêng Dipati Bintara | wontên kang kawarna malih | wau ta ingkang
tênaya | Jaka Supa Ki Nom nami | ri sêdhêng agêng mangkin | pan
sapangon wayahipun | sêlamine tinilar | mring rama langkung prihatin |
siyang dalu cêgah dhahar lawan nendra ||

--- 308 ---

33. anendra ing papah gêdhang | yèn boga pindho sêsasi | manjing dadi
tapanira | tinarima mring Hyang Widhi | dipun paringi gaib | Ki Ênom sêkti
pinunjul | bisa awor lèlêmbat | pandhe ngawang-awang bangkit | tan
kawêkên pandhe ing sajroning toya ||

34. mangkana Supatênaya | marêk ngarsa eyangnèki | têtanya
sudarmanira | matur mring eyang dipati | dhuh eyang dhatêng pundi | pun
bapa lami tan mantuk | amba arsa nusula | kang eyang ngandi aris |[31]
anggèr aja nusul môngsa katêmua ||

35. ramanira lagi lunga | andhèrèk mring Sunan Kali | iya angidêri jagat |
kang jinujug datan masthi | rina wengi lumaris | datansah andon
manglangut | yèn lunga tan pêpoyan | têkane datan baribin | ingkang
wayah kèndêl dènira têtanya ||

36. kêsarū kang eyang prapta | carakanirèng narpati | Ki Tumênggung
Supadriya | dinuta nimbali siwi | wus katur sang dipati | ing Tuban sampun
cumundhuk | ngancaran kinèn lênggah | sêmana wus tata linggih | sang
dipati ing Tuban anamudana ||

37. Ki Tumênggung Supadriya | sangêt nuwun amangsuli | anuli sinungan
mucang | tan dangu dhaharan mijil | langkung sukaning galih | dipati
myang ki tumênggung | dene

--- 309 ---

bisa kêpanggya | sukaning tyas tanpa pami | wusnya aso umatur Ki
Supadriya ||

38. sang dipati lampah kula | ingutus sri narapati | kinèn nimbali Ki Supa |
kinêrig anambut kardi | sagung êmpu rad Jawi | kinêrig mring Majalangu |
sami kinèn akarya | dhuwung pusaka narpati | dhapur nagasasra nging
tan na kaduga ||

39. mangsuli sang adipatya | sumôngga ing asta kalih | nanging ta putra
andika | nuju kesah ngiring-iring | dhumatêng Sunan Kali | sampun lami
datan mantuk | punika wayah dika | Supaputra mêngtas nangis | tanya
bapa arsa nusul kula ampah ||

40. sigra têdhak Supadriya | marêpêki wayahnèki | Supaputra gya
cinandhak | binopong ginawa linggih | têtanya Supasiwi | sapa bopong
marang inghun | nauri Supadriya | kakèkira inghun iki | iya inghun
bapakane ramanira ||

41. Ki Supatênaya bungah | tinuduhkên eyangnèki | lir kêpanggih ingkang
rama | bungahe Ki Supasiwi | ya ta kèndêl sawêngi | Supadriya Ki
Tumênggung | enjing nuli pamitan | marang Sang Dipati Tubin | Supaputra
kêlayu mring eyangira ||

42. tumut marang Majalêngka | dipun ampah ibunèki | nging ki ênom
datan kêna | malah

--- 310 ---

mangkat andhingini | ngandika sang dipati | marang putra sang rêtnayu |
lah nini turutana | putranira malah dhingin | ki tumênggung lumampah
ana ing wuntat ||

13. Pangkur

1. Supadriya nitih kuda | ingkang wayah binoncèngakên ngarsi | langkung
suka ki tumênggung | adarbe wayah priya | Supaputra dhasar pêkik
warnanipun | samarga-marga cangkrama | sakarsane dèn turuti ||

2. ing marga datan winarna | sampun lêpas wau dènnya lumaris | wus
prapta ing Majalangu | laju malêbèng pura | ki tumênggung sigra cundhuk
lan sang prabu | Supadriya atur sêmbah | dewaji atur udani ||

3. lêpating lampah kawula | animbali pun Supa tan kapanggih | kesah
milwa gurunipun | Jêng Sunan Kalijaga | tan kantênan purugipun kang
jinujug | punika Supatênaya | pun Ênom ingkang wêwangi ||

4. mila lare kula bêkta | kang kula mrih Supa nuntêna prapti | angandika
sang aprabu | ya bènêr aturira | sri narendra ngandika mring Supasunu |
lah ta bayi apa sira | bisa pandhe gawe kêris ||

5. yèn wus bisa pandhe sira | ingkun uga gawèkna kêris siji | ingkang aran
dhapur sèwu | yèn bènêr karyanira | mêtthi sira sun ganjar bumi kang
agung |

--- 311 ---

sun angkat lungguh bupati | lawan sun paringi putri ||

6. Ki Ênom umatur nêmbah | dèrèng sagêd kawula pandhe kêris | bilih wontên karsa prabu | sagah dèrèng kantênan | datan selak mring karsanira sang mulku | nging wontên panuwun amba | sagunging gêrangan wêsi ||

7. tuwin kang rujadan tosan | pinagutna munggèng têpining jladri | pasisir lèr prênahipun | inggih panuwun kula | wit punika dununging bêsalèn ulun | anèng madyaning samodra | pilih janma kang udani ||

8. sang nata gawok tumingal | mring aturing nênggih Ki Supasiwi | tan môntra lare turipun | dene kadi wong tuwa | sri narendra anuruti karsanipun | mangkana aris dêlingnya | iya sira sun turuti ||

9. panuwunmu Supaputra | gung gêrangan lawan rujadan wêsi | myang sagunging para êmpu | padha angkatêrêna | mring Ki Ênom angambila wêsi agung | kèhing wêsi Majalêngka | gawanên yya ana kari ||

10. atêrêna marang Tuban | pagutêna munggèng têpi jladri | bocah ingkun Majalangu | kang padha anggawaa | sagung kuli aja ana ingkang kantun | ingkang kinèn nêmbah mentar | sampun mijil saking puri ||

11. wus prapta ing pagêlaran | para [pa...]

--- 312 ---

[...ra] êmpu panggih lan rowangnèki | miwah sikêp Majalangu | kang kinèn gawa tosan | wus sumêkta sigra mangkat ki tumênggung | ingkang ngiring Supaputra | angalèr marang pasisir ||

12. kunêng ta ingkang lumampah | kawarnaa ingkang kesah wus lami | Pangeran Sêndhang winuwus | kêlawan ingkang garwa | anèng dalêm pangeran èngêt dèn utus | marang Sunan Kalijaga | ngulati pusaka aji ||

13. lawan èngêt garwa putra | ingkang kèri anèng nagari Tubin | pangeran
aris amuwus | pamit mring garwanira | aduh mirah lilanana raganingsun
| aku tuwi marang Tuban | ingsun tilar lare alit ||

14. yun uning apa uripa | putranira kang kèri anèng Tubin | sang dyah tan
mangsuli wuwus | nging kumêmbêng kang waspa | awit nêdhêng
pêpasihan sang rêtnayu | marêngi garbini tuwa | dungkap sapta côndra
nênggih ||

15. langkung wrat tinilar priya | yèn ngampaha sang rêtna langkung ajrih |
pangeran wus pirsèng sêmu | kang garwa pêpasihan | nanging pangran
tan liya kaciptèng kalbu | mung dhuwung Kyai Sangkêlat | kang
siningitkên nèng kali ||

16. pangeran ngimur ing garwa | nèng paprêman tansah ingarih-arih |
supadya lêjaring kalbu | èsmu rum ngandikannya | dhuh dhuh

--- 313 ---

anggèr kang sawang ratih swarga gung | satuhu sêtya mring priya | lah
garwèngsun donya ngakir ||

17. pun kakang tan nêdya pisah | lawan sira pujanku wong jukining |
akathah mêmanisipun | lir kombang ngisêp sêkar | ginunturan srênggara
lêjar tyasipun | datan lênggana ing karsa | tangèh rêngganing kang rêsmi
||

18. tan kawarna asmaranya | sampun lênggah sarimbit kakung putri |
Pangran Sêndhang manabda rum | dhuh mirah ingsun wêkas | akèria
lamun lair putraningsun | yèn priya wèhana aran | Jaka Sura aprayogi ||

19. kêlamun mahya wanodya | sakarsanta yayi dènnya ngarani | lan iki
têtilar ingsun | calon kris kalih wêlas | kèh sawabe rawatana dèn barukut |
sun buntêl upih sêdaya | wus padha ingsun talèni ||

20. wus têlas pawêlingira | ingkang garwa ingaras wanti-wanti | wus
tinimbul ingkang êmbun | sang dyah mangaras pada | pangran mijil
rangu-rangu tindakipun | ketang trêsnaning kang garwa | datansah
mandhêg tumolih ||

21. wus laju pangran tindaknya | saking Sêndhang tan mawi rowang siji |
sêsingidan lampahipun | ngidul mring Bêlambangan | angampiri
rawatanira kang dhuwung | pusaka Kyai Sangkêlat | kang siningitkên ing
kali ||

--- 314 ---

22. ing marga tan winarna |[32] Pangran Sêndhang Bêlambangan wus
prapti | narmada ingkang jinujug | ngambil rawatanira | Ki Sangkêlat
anèng sangisoring watu | pitung sasi nèng jro toya | tan têtês kinum ing
waruh ||

23. duk sêmana wus ingêntas | saking toya nuli binuntêl upih |
kinalungkên munggèng gulu | pangran lajêng tindaknya | murang marga
tumrun jurang munggah gunung | kalunta-lunta lampahnya | pringgabaya
tan kaèksi ||

24. siyang dalu wisatanya | ngalor ngulon Tuban sinêdyèng galih | sigêg
gênti kang winuwus | nênggih Ki Supaputra | nèng samodra apandhe
sajroning ranu | lawan êmpu Majalêngka | apandhe pinggir jaladri ||

25. wau ta Ki Supaputra | sakèh wêsi Majalêngka binasmi | wêsi gêrangan
sagunung | anèng pinggir sagara | kang binasmi anèng sajronirèng ranu |
lêbur awor lawan toya | datan ana dadi kêris ||

26. kêrig wêsi sanêgara | dèn dhatêngkên munggèng pinggir pasisir |
binasmi sajroning ranu | lêbur tan môntra gatra | datan ana ingkang
warna dadi dhuwung | miwah ingkang nèng dharatan | karya dhuwung
tanpa dadi ||

27. kawarnaa kangjêng sunan | kang asrama anèng ing pulo upih | wus
priksa pulunanipun | kabutuh sanggupira |

--- 315 ---

karya kêris dhapur sasra mring sang prabu | gung wêsi binasmi têtas | ora
ana dadi kêris ||

28. kangjêng sunan wlas tumingal | ingkang putra pinardi mring sang aji |
kêrigan kabutuh laku | anuli pinarpêkan | kadya thathit kangjêng sunan
tindakipun | sakêdhap netra wus prapta | ing Tuban jujug jêladri ||

29. ing prênahe Supaputra | kangjêng sunan kèndêl nyampar ring
wari[33] | langkung panas ingkang ranu | prabawa Supaputra | dènnya
pandhe ububan gêrananipun | aparon dhadhêngkulira | supit darijinya
kering ||

30. sikut kanan pukulira | gunging wêsi pinukul tanpa dadi | kangjêng
sunan nuli rawuh | kang putra tinimbalan | lah Ki Ênom amêntasa saking
ranu | sun arsa panggih lan sira | kagèt Supaputra mijil ||

31. sampun minggah ing dharatan | prapta ing ngarsaning uwa ngabêkti |
rinangkul lungayanipun | jêng sunan angandika | ya mulane sira pandhe
anèng ranu | Ki Ênom umatur nêmbah | môngsa boronga sang yogi ||

32. sadèrènge matur amba | jêng sinuwun nênggih sampun udani |
angandika sang awiku | ya bènêr aturira | sira iku kaki kabutuh ing laku |
nyanggupi karyaning bapa | dudu traping [tra...]

--- 316 ---

[...ping] wong kinêrig ||

33. nambungi karyaning bapa | sawêtara aja kapara ngarsi | inghun kaki
asung tuduh | wong sanggup sira tuwas | bokmanawa ana pitulung Hyang
Agung | angganjar mring titahira | nrimaa panduming Widhi ||

34. inghun kaki datan nyana | sira bisa pandhe sajroning warih | marga
wikan iya inghun | kêris nêng jro samodra | iki wêsi kodrat gêdhene
saklungsu | Ki Supaputra manêmbah | anyadhong nampani wêsi ||

35. mangkana Ki Nom aturnya | dene alit punapa dados kêris | dene
punika sagunung | tosan ing Majalêngka | botên wontên kang dadya
kinarya dhuwung | Sunan Kali angandika | iku padha karo wukir ||

36. kang wêsi anut ing sabda | sanalika agêng saengga wukir | Supaputra
kagyat dulu | asta kawratan tosan | sinèlèhkên saya wêwah agêngipun |
pan anglir prabata suta | mitênggêngên Supasiwi ||

37. kawarnaa kang lumampah | Pangran Sêndhang kondur dhumatêng
Tubin | nêng marga miyarsa tutur | pra êmpu Majalêngka | nambut karya
pasisir lèr prênahipun | anuli Pangeran Sêndhang | nurut marga mring
pasisir ||

38. wus prapta ing prênahira | dènnya pandhe êmpu ing Majapait |

--- 317 ---

pangeran sarêng andulu | marang raka jêng sunan | ri saksana majêng
ngarsa awotsantun | umangsah mangaras pada | rinangkul wus kinèn
linggih ||

39. jêng suhunan angandika | dene lawas jêbèng paran ing kardi |
pangeran wotsêkar matur | solahing lampahira | saking purwa madya
praptèng wusana wus | sang tapa aris ngandika | lah jêbèng sirantuk bathi
||

40. Pangran Sêndhang matur nêmbah | inggih darmi kawula anglampahi |
saking barkah jêng sinuwun | jêng sunan malih nabda | mring Ki Ênom
apan sarwi ngasta dhuwung | lah iki karyanên pola | gêdhe cilike kang
kêris ||

41. Ki Ênom dangu tan ngucap | langkung èwêt dening agênging wêsi |
sangêt kewranirèng kalbu | jêng sunan asung wikan | marang Supa jêbèng
apa sira pandung | lah puniku putranira | Ki Ênom diwasa mangkin ||

42. Ênom iku ramanira | lah ing nguni sira angarsi-arsi | sarêng dulu
kalhipun | gapyuk arêrangkul | ingkang putra ngabêkti tansah
rinangkul | ingaras êmbunanira | karweka suka tan sipi ||

43. sawusnya arêrangkul | pangran tansah onêng marang kang siwi |
sang tapa ngandika arum | lah kaki Supaputra | nuli wêsi [wê...]

--- 318 ---

[...si] saklungsu karyanên dhuwung | Ki Ênom matur sandika | wêsi
sampun alit malih ||

44. manut sabdane jêng sunan | ingkang wêsi gênge saklungsu malih |
sêmana ingambil gupuh | marang Ki Supaputra | nuli nêmbah nuwun amit
malbèng ranu | pandhe nèng jroning samodra | datan dangu dadi kêris ||

45. sigra Supaputra mêngtas | dhuwung katur dhatêng Jêng Sunan Kali |
tinampan nuli dèn ukur | tinandhing Ki Sangkêlat | gêng panjange tanapi
ing êlukipun | muhung kaot mawi naga | dumunung munggèng gègandhik
||

46. kangjêng sunan angandika | kêris iki dhapur sun arani | nagasasra
dhapuripun | de sira sanggup uga | karya kêris ingkang aran dhapur sèwu
| kang dadi karsaning nata | iki kêris sèwu siji ||

47. amung sawiji naganya | dene dhapurira wisnu puniki | sêgarawedang
ranipun | awit anggane karya | nèng sêgara apanas rasaning banyu |
pantês agêming narendra | aturna marang sang aji ||

48. kang dhuwung sigra tinampan | mring Ki Ênom jêng sunan nabda
malih | lah nya jêbèng ingkang dhuwung | pundhènira sangkêlat | Pangran
Sêndhang manêmbah nuwun turipun | kawula ajrih nganggea | mênawi
katlisut malih ||

49. kawus [ka...]

--- 319 ---

[...wus] kang sampun kêlampah | lawan malih sabda tuwan ing nguni |
sangkêlat agêming ratu | mangke kula sumôngga | jêng panduka kang
sampun jumênêng ratu | mêngkoni ing tanah Jawa | kangjêng sunan
nabda malih ||

50. ya uwis ingsun tarima | bènêr sira tan milu darbe waris | kang wajib
warising ratu | iya kang pancêr lanang | lah ta uwis sebaa mring
Majalangu | sigra kondur kangjêng sunan | sakêdhap wus tan kaèksi ||

51. Pangeran Sêndhang sêksana | pêpanggihan lan êmpu nambut kardi |
nèng pasisir pêpak sagung | Tumênggung Supadriya | langkung suka
panggi lawan putranipun | datanapi ingkang wayah | Ki Ênom kang
nambut kardi ||

52. anèng sajroning sagara | sampun dadya kang dhuwung sèwu siji | wus
winartan para êmpu | sadaya sukèng driya | nuli bubar mundur marang
Majalangu | ing marga datan winarna | lir sarkara lampahnèki ||

Taksih wontên sambêtipun.

--- 320 ---

Manawi dipun pirsani sagêbyaran, suraosing sêrat punika kathah ingkang
sajak: anèh, mokal utawi nyalênèh. Mila kathah-kathahipun para mudha
wontên ingkang lajêng anggumuni têrkadhang ngantos dumugi maibên
(yak punapa inggih). Makatên wau sabab saking anggèning botên
pinanggih ing nalar, kados ta: kawontênanipun widadari Dèwi
Nawangwulan, ingkang lajêng botên sagêd mabur namung jalaran saking
panganggenipun kapêndhêt dening Jaka Tarub, dados sok makatên
punapa widadari punika namung kados pêksi kemawon, manawi dipun
barundhuli êlaripun lajêng botên sagêd mabur, utawi sok makatên
ingkang anggadhahi katiyasan sagêd mabur punapa panganggenipun,
dados sanès katiyasaning kawidadarènipun. Mustakaning masjid ing
Dêmak, kenging kagathukakên kalayan mustakaning masjid ing Ngarab.
Pusaka Kyai Condhongcampur Bôndawala kalayan Kyai Sangkêlat, sarta
salajêngipun ngantos oncat, lan sanès-sanèsipun.

Gumun sarta pamaibên wau pancèn inggih wontên lèrêsipun, jêr
panggrayangipun namung sarana nalar utawi pikiran, rèhning babagan
wau nama rungsid, mila langkung prayogi manawi karsa analusur sarana
wêninging raos, kalaras ingkang ngantos cundhuk, bokmanawi mangke
sagêd manggih raos ingkang marêmakên, lan lajêng ngandika: O kok iya
bènêr. Lah têka samantên muluking panggalhipun para sarjana,
yêyasaning saloka ngantos botên gampil ginagapan.

Ki De Bra

--- [0] ---

[Grafik]

Sang Prabu Brawijaya siniwaka, lajêng sowanipun Kyai Agêng Sela lan
Adipati Bintara.

swedanya. (kembali)
jêtung. (kembali)
pêpanggungan. (kembali)
anggèr. (kembali)
Majapait. (kembali)
sang. (kembali)
mundhut. (kembali)
karsaningwang. (kembali)
wastra. (kembali)
angling. (kembali)
èsmu. (kembali)
Lebih satu suku kata: kaliru mring astanira. (kembali)
sinambut. (kembali)
istijratira. (kembali)
Majapait. (kembali)
jawat (dan di tempat lain). (kembali)
rêmit. (kembali)
sira. (kembali)
Sêngkalan: lawang trus gunaning janma (1399 A.J.). (kembali)
gawok. (kembali)
Dwarawati. (kembali)
anggagat. (kembali)
Kurang satu suku kata: myang pangiwa kadigdayan kanuragan. (kembali)
Lebih dua suku kata: nuli pêjah layon kumambang ing warih. (kembali)
sênthong. (kembali)
agundandapan. (kembali)
botên. (kembali)
Kurang satu suku kata: angling malih sang dipati. (kembali)
musthikaning. (kembali)
olèh. (kembali)
Kurang satu suku kata: kang eyang ngandika aris. (kembali)
Kurang satu suku kata: ing marga datan winarna. (kembali)
warih. (kembali)
Kategori
Agama dan Kepercayaan
Arsip dan Sejarah

Bahasa dan Budaya
Kisah, Cerita dan Kronikal
Koran, Majalah dan Jurnal
Referensi
Huruf Jawa
Lambang Fonetis
Penanggalan Jawa
Singkatan dan Akronim

Copyright © 2011-13 Yayasan Sastra Lestari. All Rights Reserved.

Our site is valid CSS Our site is valid XHTML 1.0 Transitional